

# CARTA NU GUTHEL·LA' APÓSTOL SAN PABLO PARA CA ENNE' CORINTO

Primera Epístola Del Apóstol San Pablo A Los

## CORINTIOS

**1** Inte' Pablo lani hermano qui' ri'u Sóstenes. Jesucristua nna chi gutãyie inte' para cca' apóstol qui'e de acuerdo lani la' rulábalatsi' tsè' qui' Tata Dios. <sup>2</sup>Lebi'i ca enne' ríalatsi' le' ciudad Corinto canu retuppa rudàliani le Tata Dios. Chi ná le ttùba lani Cristo Jesús nna, chi bètsi'e le yà'latsi' nna chi gutãyi huée le para cca le enne' nàri lani iyaba canu rul·luítsa' çã ne gaỹa tediba tse'e çã. Jesucristua nna née Xana' qui, ná huée Xana' ri'u. <sup>3</sup>Calátsa'a' qui'ni Dios Padre qui' rí'ua nna gunie le bendecir lani adí favor qui'e a'hua lani la'ỹeni nu runna Jesucristua enne' née Señor lo iyate.

<sup>4</sup>Tulidàba ruí'a' gracia Tata Dios quia' por lebi'i, a'hua porqui'ni née enne' bueno lani le nna benie le ttùba lani Cristo Jesús. <sup>5</sup>Acca benie qui'ni gata' capacidad tsè' qui' le. Chi ccani le riquixá'a tsè' le lani ca enne', a'hua chi té la' ritelíni tsè' qui' le. <sup>6</sup>Chi guỹi' tsè' le ca

titsa' nu chi gutixa'áni tu' le nu cca qui' Cristua. <sup>7</sup>Claru tabá rilá'ní qui'ni labí biỹa capacidad espiritual reyàtsani le miéntraste ribeda le é'l·lani Xana' Ri'u Jesucristua. <sup>8</sup>Lèe nna gunie le cualàni dèsdèba anna hàstaba qui'ni i'yu último tsá, para qui'ni canchu chi é'l·lani Xana' Ri'u Jesucristua nna labí biỹa falta ní etsèla contra lebi'i. <sup>9</sup>Tata Dios nna siempre gunie cumplir biỹa rée. La'a mísmuba lèe nna chi gutãyie le para qui'ni gata' amistad tsè' qui' le lani Ýi'nie Jesucristua Señor qui' rí'ua.

<sup>10</sup>Annana hermanos rinénia' le lani nombre qui' Xana' Ri'u Jesucristua qui'ni tse'e iyaba le de acuerdo, a'hua qui'ni bíttuúru guni le qui'ni chadi pleito entre lebi'i, sino qui'ni ccá ttùba la' rulábalatsi' qui' le nna nu runi le nna dèsdèba anna para nu chì' da'la. <sup>11</sup>Lebi'i hermanos quia', chi cca' saber nu runi le porqui'ni canu tse'e le' litsi' hermana qui' ri'u Cloé nna chi

gutixa'áni cabi inte' qui'ni télá télá ná la' rulábalatsi' qui' le. <sup>12</sup>Pues ttu te le nna rena le qui'ni tse'e le lado qui' inte' Pablo. Attu te le nna rena le qui'ni tse'e le lado qui' Apolos. Attu te le nna rena le qui'ni tse'e le lado qui' Cefas. Attu te le nna rena le qui'ni tse'e le lado qui' Cristua. <sup>13</sup>Tsí ína ri'u qui'ni Cristua nna iyé clase née cá. Inte' Pablo nna, tsí gutáa' huá' lo curutsia por lebi'i cá. Tsí begádia' le inda para cca le enne' quia' cá. Ni ttu hua ca cosj. <sup>14-15</sup>Begádia' inda làteruba hermano qui' ri'u Crispo, a'hua attu hermano la bi Gaius. Ruí'a' gracia Tata Dios qui'ni lanú nuña attu enne' huaya' benia' bautizar para qui'ni nì ttu le làa ína le qui'ni begádia' le inda para cca le enne' quia'. <sup>16</sup>Hua rexa huá látsa'a' qui'ni begadia huáláti'a' inda canu tse'e le' litsi' qui' hermano qui' ri'u Estéfanos, pero labí dá'llátsa'a' canchu begádia' nuñaáru attu enne' inda. <sup>17</sup>Porqui'ni Cristua nna benie inte' mandado aláa para gunia' ca enne' bautizar, sino para qui'ni équixa'a' ca titsa' nu cca qui'e, pero aláa tì'a ttu enne' nu ría discurso para qui'ni gudàliani ca enne' na por ca titsa' èl-la nu rinnia, sino sencillamente taá gutixa'ánia' le para qui'ni làa ccani cuenta ba nu gutixà'a' bíyalóni'a' qui'ni acca gùtti Cristua lo curutsia.

<sup>18</sup>Riquixá'a tu' claru tabá qui' Jesucristua bíyalóni'a' qui'ni acca gùttie lo curutsia. Ca enne' dia lo néda lù'uti, pues nu riquixá'a tu' nna cani ça qui'ni nâ ttu titsa' tonto. Pero para ri'u canu chi ná qui'ni l-lá ri'u le' condenación nna, ná lâ titsa'

poderoso qui' Tata Dios. <sup>19</sup>Escrito ga'na titsa' làti ra Tata Dios:

Canu rena qui'ni yala dacca' ça, pues inte' nna ni nada ba égu'a' nu chi yù ça.

A'hua canu rena qui'ni yala ritelíni ça, pues inte' nna por medio de titsa' quia' nna gúcu'énia' latsi' la' ritelíni qui' qui'.

<sup>20</sup>Acca biani gana ni runi canu rena ca enne' qui'ni yala tsè' chi ritelíni ça cá. A'hua biani gana ni runi canu rena ca enne' qui'ni yala tsè' chi nabia'ni ça ley religiosa qui' qui' cá. A'hua canu rena ca enne' qui'ni yala tsè' runi ça discutir nu cca qui' yétsiloyu, biani gana ni runi ça nì'i. Tata Dios nna por la' ritelíni tsè' qui'e nna chi benie qui'ni ettú'ni canu rena ca enne' qui'ni chi té la' ritelíni qui' qui'. <sup>21</sup>Tata Dios nna ritelínie iyátení ca cosa. Acca benie disponer qui'ni ca enne' nna labí irialàni ça gunibia' ça ne por medio de la' ritelíni qui' ba qui', sino guyú'u lá latsi'e gudilèe ca enne' tsíalatsi' por medio de ca titsa' nu runi tu' predicar, màsqui'ba rena ca enne' qui'ni labí dacca' nu riquixá'a tu'. <sup>22</sup>Anía rena ca enne' judío porqui'ni rinàba ça biya ttu cosa nu ilá' tènì ça tì'a ttu prueba de la'huacca de yiabara'. Ca enne' griego nna calatsi' qui' ca dicho nu rinne ca enne' sabio. <sup>23</sup>Pero intu' nna riquixá'a tu' nu cca qui' Cristua enne' gùttie le curutsia. Para ca enne' judío nna mensaje nu riquixá'a tu' nâ ttu titsa' tàbi para tsíalatsi' qui'. Ca enne' griego nna rena ça qui'ni mensaje nu rute tu' nâ ttu cosa sencilla nu labí dacca'

para tsíalatsi' qui. <sup>24</sup>Pero para iyaba ri'u canu chi náyini Tata Dios, tàntua ca enne' judío nna a'hua ca enne' griego nna, pues chi ríalatsi' ri'u qui'ni Cristua nna née prueba de la'huacca qui' Tata Dios nna ná huée enne' té itute la' ritelíni qui'e nna. <sup>25</sup>Màsqui'ba rena ca enne' qui'ni labí dacca' nu rinne Tata Dios, pero adila yùe tì'chula làça. A'hua màsqui'ba rena ca qui'ni labí suficiente ná nu benie, pero adila la'huacca té qui'e tì'chula làça.

<sup>26</sup>Lebi'i hermanos canu chi gutàyi Tata Dios, liulábalatsi' le biya clase de enne' ni na le. Tuchùppa teruba le rena ca enne' qui'ni té la' ritelíni qui' le. A'hua labí iyé le ná le enne' dacca' para lani ca enne'. A'hua lahuá iyé le ná familia importante le' yétsi qui' le. <sup>27</sup>Pero Tata Dios nna chi becuí'e canu labí re' ca cuenta le' yétsiloyu para qui'ni anía modo nna ettú'ni canu rena ca enne' qui'ni yala ritelíni ca. A'hua ca enne' débil to' nna becué' Tata Dios ca para anía modo nna ettú'ni canu rena ca enne' qui'ni yala la'huacca té qui' qui. <sup>28</sup>Porqui'ni Tata Dios nna becuí'e ca enne' sencillu tó' canu ná ca tì'a ttu yíyi to' para yétsiloyu, quiere decir canu labí dacca' iyu' según yétsiloyu, para qui'ni gúcue'eníe latsi' iyaba nu rena ca enne'. <sup>29</sup>Anía modo nna ni ttu ca enne' nna té biya qui' para thálianía ru'a lo Tata Dios. <sup>30</sup>Porqui'ni solamente por Tata Dios nna acca chi ná le ttùba lani Cristo Jesús. Tata Dios nna benie disponer qui'ni Cristua nna quée la'ritelíni tsè' de yíabara' para ri'u. A'hua por Cristua nna irianàri ri'u

ru'a lo Tata Dios nna, chi bètsi'e ri'u yà'latsi' para cca ri'u enne' nàri le' yétsiloyui. Lèe nna beyèl-le'e ri'u latsi' ná' numalua. <sup>31</sup>A' modo nna télíni ri'u nu chi ga'na escrito:

Canchu nuya calatsi'ì ebàta'á  
por nu chi benia, pues adila  
tsa' gudàlianía Señor por nu  
chi benie lani a.

**2** Inte' Pablo loti' bitá' lati tse'e le, gutixa'ánia' le nu beni Tata Dios. Pero alàa gutixa'ánia' le lani ca titsa' èl-la tì'a canu rute discurso para qui'ni ína ca enne' qui'ni yala enne' sabio ná ca. <sup>2</sup>Ántesca íl-lania' látsi le nna chi belaba látsa'a' quixa'ánia' le puro nu cca qui' Jesucristua bíyalóni'a qui'ni acca gùttie lo curutsia. <sup>3</sup>A'hua loti' gùdua' lani le, uccua te' qui'ni labí ná' suficiente, acca gutà'a ttu la' rátsilatsi' lo lóstu'a' nna biyìtti'níá'. <sup>4-5</sup>Labí benia' predicar para gurexaél-la'a' le lani cuenta titsa' ba, sino uccua lá látsa'a' cca le saber nu runi Espíritu nna a'hua la'huacca qui' Tata Dios nna para qui'ni gata' fe qui' le, pero alàa por nu rena ca enne' según la' riyeni qui' ba qui, sino por la'huacca qui' Tata Dios.

<sup>6</sup>Lebi'i canu chi nabia' tsè'nì le, chi yù le qui'ni nu riquixá'a tu' nna nà la' ritelíni tsè'. Porqui'ni la' ritelíni qui' tu' nna labí nà tì' rulába latsi' ca enne', nihua tì' rulaba latsi' canu rigú'ubia' le' yétsiloyu, pues iyaba ca nna l-lúya bá latsi' nu rena ca. <sup>7</sup>Pero nu riquixá'a tu' nna nà la' ritelíni nu runna Tata Dios. Labí nabia'ni ca enne' la' rulábalatsi' qui'e, porqui'ni Tata Dios ántesca gunie yétsiloyu nna chía nanie qui'ni làa ccá ca enni'a na saber,

sino qui'ni ri'u annana cca la ri'u a saber, quiere decir salvación qui' ri'u nna la'yani' qui'e nna. <sup>8</sup>Ni ttu canu rigú'ubia' le' yétsiloyu labí té la' riyeni qui' qui' para ccá cã saber ca così. Cãalã hualigani té la' ritelíni tsè' qui' qui', entonces labí lá biya bedácca' cã Señor Enne' Tsuna' qui' rí'ua nna betáa' cã ne lo curutsia. <sup>9</sup>Ti'ba ga'na escrito làti ra qui'ni:

Ca cosa nu labí chi bila'ni ca enne', ñihua labí chi biyénini cã, ñihua labí chi belaba latsi' qui' nna,

beni Tata Dios cã preparar para ca enne' canu catsi'íni cã ne.

<sup>10</sup>Ca così nna chi beni Tata Dios qui'ni cca ri'u cã saber por medio de nu runi Espíritu lo loto' ri'u. Espíritu nna chi yùe itúyia te la' rulábalatsi' qui' ri'u, a'hua la' rulábalatsi' qui' Tata Dios. <sup>11</sup>Por ejemplo, núní ttu enne' ni nabia'niã nu rulaba latsi' attu nu huaya' cá. Lanú nuya yù biya rulaba latsi' attu enne' sino làteruba lã nna yùã por la'a espíritu qui' bí. A'hua Tata Dios nna, lanú nuya nabia'niã la' rulábalatsi' qui'e sino làteruba Espíritu enne' guthèl·le' de yïabara'. <sup>12</sup>Capacidad qui' ri'u para qui'ni télíni ri'u nu chi beni Tata Dios para ri'u, labí ná por la' riyeni qui' yétsiloyu, sino ná lã por la' ritelíni nu runna Espíritu enne' guthel·la' Tata Dios. <sup>13</sup>Nui nna riquixá'a tu', pero canu rena ca enne' qui'ni yala la'ritelíni té qui' qui', pues làcã nna labí beluè'ni cã intu', sino ca enseñanza nu riquixá'a tu' nna beluè'ni Espíritu cã lani intu' de rethàtsilà'na tu' ca

titsa' qui' Tata Dios lani la' ritelíni nu runna Espíritu, titsa' lani titsa'.

<sup>14</sup>Pero ttu enne' nu requia ba lo néda qui' bí, lã nna labí caso runiã nu rulue' Espíritu enne' guthel·la' Tata Dios, porqui'ni caniã qui'ni ná enseñanza nu labí rulue' tsè' para lã; pues labí posible ná para télíniã ca così, porqui'ni por làteruba la'huacca nu runna Espíritu a' modo télíni ri'u nu cca qui' Tata Dios. <sup>15</sup>Pero ttu creyente nu runiã reconocer qui'ni làteruba lani Espíritu Santo da' la' ritelíni lígani, entonces lã nna ítsatsã iyábani ca cosa biya nuá ná cã: lã nna labí ccã juzgar por nuya attu enne'. <sup>16</sup>Porqui'ni núní té capacidad qui' para gunibí'ã la' rulábalatsi' qui' Señor cá. Núní té la' ritelíni suficiente qui' para quixá'aniã Señor ttu enseñanza nu labí chi yùe cá. Lanú. Pero ri'u nna chi té la' ritelíni qui' Cristua lani ri'u.

**3** Acca lebi'i hermanos, labí chi gunénia' le iyate nu ná qui'ni cca le saber, porqui'ni labí chi bidète' le suficiente nu rulue' Espíritu para thí' le adí enseñanza. Màsqui'ba chi ná le ttùba lani Cristo, pero ná ru le tì'a ttu huatsa to' nu labí chi ritelíniã tsè'. <sup>2</sup>Acca benia' le alimentar, alãa lani alimento sólido nu adiru itsa' le, sino lani índiayí' yã teruba, a'hua labí chi ná le para thí' le titsa' de alimento tsè'. <sup>3</sup>Porqui'ni modo qui' le antes nna runi rùã le dominar, acca hua yù'u ruhuá la' yélatsi' lo loto' le, a'hua télá télá ná la' rulábalatsi' qui' le, a'hua calatsi' le íl·la'ani luetsi le. Por ca così nu runi lã nna, acca yù ri'u qui'ni titó'

rúbá chi bitsiáni la'labàni qui' le, álá. Quiere decir qui'ni runi rù le tì'a runi adí ca enne' yétsiloyu. <sup>4</sup>Acca ttu te le nna rena le qui'ni tse'e le lado qui' inte' Pablo. Attu te le nna rena le qui'ni tse'e le lado qui' Apolos. Tsí álahua ą' huá ná ca partido nu cca yétsiloyu cá. <sup>5</sup>Biani poder ni té qui' Apolos cá. Labí biŷa. Biani poder ni té qui' inte' Pablo cá. Labí biŷa. Intu' nna huenitsina teruba qui' Señor ná tu' para qui'ni tsíalatsi' lí e por nu riquixa'áni tu' le de acuerdo lani mandado nu benie ttu ttu tu'. <sup>6</sup>Inte' nna gutixa'ánia' le tita' qui' Tata Dios primero, tì'a gáda ttu enne' ttu semilla to'. Después nna gul'łani Apolos enne' gutixa'áni bi le adí, tì'a rudua ttu enne' inda para ccá alimentar ca planta to'. Pero làteruba Tata Dios té la'huacca qui'e para gunie qui'ni iŷèni le. <sup>7</sup>Chi yù ri'u qui'ni làteruba Tata Dios née enne' re' cuenta, porqui'ni labée nna runie qui'ni iŷèni ca planta to', aláa enne' rada ñihua enne' rudua inda labí la'huacca té qui' qui' para qui'ni ca planta to' nna iŷèni cą adí. <sup>8</sup>Enne' rada ą'hua enne' rudua inda nna ttùba compania ná cą. Pero Tata Dios nna gutie recompensa qui' ttu ttu tsa qui' tì'iŷa ná bá nu benią. <sup>9</sup>Intu' nna runi tu' cualàni lo tsina nu runi Tata Dios lo losto' ca enne'. Lebi'i nna espiritualmente ná le ttu loyu nu runi Tata Dios tsina nna, ttu yú'u nu richìthèe. <sup>10</sup>Conforme lani capacidad nu chi benna Tata Dios quia', inte' nna tì'a ttu maestro albanil guléqquia' cimiento. Làniana attu nu huaya' runią seguir lani tsina nna rucua'ą

dé'è lo cimiéntuą'. Pero ttu ttu tsa le nna té qui'ni inna' le tì'iŷa ucuà' le. <sup>11</sup>Ttu yú'u nna labí modo té ccá chùppa cimiento qui'ł. Cimiento qui' fe qui' ri'u nna née Jesucristo. Labiru ná qui'ni nuŷa gunią formar attu cimiento huaya'. <sup>12</sup>Tuchùppa le nu rucua' le lo cimiéntua nna xiaba runi le ttu tsina nu gucha tì'a oro nna plata nna ca iŷya nu dacca' yaŷi l'le. Xiaba tsina qui' átuchùppa le nna labí guchią, tì'a bereta l'le yíŷi l'le ca l'la' bitsi l'le. <sup>13</sup>Tsina nu runi ttu ttu tsa ri'u nna té qui'ni edácca'níą biŷa material ni bicua'níą, porqui'ni canchu chi i'yu tsá señalado làniana il'áníą claru taá, pues lani yí'a nna cca ri'u saber, porqui'ni yí'a nna gunią na prueba. <sup>14</sup>Quiere decir qui'ni tsina nu runi ttu ttu tsa ri'u nna, canchu dàcca'ą entonces egà'ną nna bittu ba tsáya, làniana gunna Tata Dios la'dàliani qui' ri'u. <sup>15</sup>Pero canchu ttu nuŷa tsáyi bá tsina nu beni naá, entonces nittu ba iyaba nu beni naá pero la'a mísmuba lą nna l'lá bą màsqui'ba tì'atsi ttu cosa nu chi'beria taáni le' yí'. <sup>16</sup>Tsí álahua chi yù le qui'ni chi ná le yú'u qui' Tata Dios cá. Anía chi ná le porqui'ni Espiritu enne' guthèl'le'e chi dúe lo losto' le. <sup>17</sup>Canchu nuŷa gunią qui'ni itàppa' yú'u qui' Tata Dios, entonces Tata Dios nna gunie na juzgar lani castigo. Porqui'ni yú'u qui' Tata Dios nna ną tsina santo; lebi'i nna ná le yú'ł. <sup>18</sup>Canchu nuŷa ttu le canią qui'ni yala la' ritelíni chi té qui'ł porqui'ni chi nabia'nią nu cca qui' yétsiloyu, pues ná qui'ni huí'ą cuidado làa thacca'yíą, sino adila tsa' canią qui'ni ñidirua labí

chi yùà biyā, a' modo nna gata' la' ritelíni nu dacca' qui'i. <sup>19</sup>Porqui'ni la' ritelíni nu dacca' para lani yétsiloyu nna labí dàcca'ā para lani Tata Dios, tì'a escrítabá ga'nā làti ra qui'ni:

Canu cani cā qui'ni yala la' ritelíni chi té qui' qui,  
Tata Dios nna gunie qui'ni ínnia cā por ca propósito mal qui' qui.

<sup>20</sup>A'hua ra attu lèttia qui'ni:

Señor nna nabia' ranínie la' rulábalatsi' qui' canu cani qui'ni yala chi yù cā.  
Chi yùe qui'ni labí dacca' nu rena cā.

<sup>21-22</sup>Acca bíttuúru tháliani le nna bittu ína le qui'ni tse'e le lado qui' nuyā tu', porqui'ni iyaba nu rithel-la' Tata Dios lani le nna ná cā aprovecho tsè' para lebi'i, sea inte' Pablo o Apolos o Cefas l-le, pues iyaba tu' nna tse'e tu' lado qui' le. A'hua yétsiloyu nu beni Tata Dios nna, la'labàni o lù'uti l-le, a'hua ca tsá anna o nu chì' da'la l-le, pues iyate hua ná para aprovecho tsè' qui' le. <sup>23</sup>Porqui'ni lebi'i nna chi ná le qui' Cristua, Cristua nna née qui' Tata Dios.

**4** Adila tsa' éxalatsi' ca enne' qui'ni ná tu' huenitsina teruba qui' Cristua. Ca enseñanza nu cca qui' Tata Dios nu labí chi bina ri'u ttu cuayā nuá, pero lèe nna chi benie intu' encargar para quixá'ani tu' le iyaba nu rèe. <sup>2</sup>Canu ná cā encargado lani biyā tsina, té qui'ni ttu ttu tsa cā nna tsé'e cā al tanto. <sup>3</sup>Canchu calatsi' le guyu le la'ditsi quia', titó' ruba dacca' para inte' canchu inne le contra

inte', nihua canchu ttu tribunal calatsi'i' cueqquiā sentencia quia'. Porqui'ni nihua inte' nna labí runia' juzgar la'a inte' ba canchu hua ná tsè' tsina nu runia' por Señor o canchu labí. <sup>4</sup>Màsqui'ba càte' qui'ni labí biyā mal ni chi benia', pero álahua por nua' irianària', porqui'ni làteruba Señor yùe canchu labí ná tsè' tsina nu runia' por lèe o canchu hua ná tsè'. <sup>5</sup>Acca nú ttu nuyā guni le juzgar hàsta qui'ni canchu chi él-lani Señor, porqui'ni lèe nna gudàni'e lo nu gattsì' ba le' chul-la, a'hua gúlui'e hàstaá la' rulábalatsi' nu adiru gattsì' lo losto' ri'u, làniana Tata Dios nna gudàlianie ttu ttu enne' según nu benia' le' yétsiloyuj. <sup>6</sup>Nu chi gutixa'ánia' le hermanos, inte' nna Apolos nna ná tu' ejemplo para lebi'i, para qui'ni idète' le qui' tu' nna bittu gulaba latsi' le adí teerulá de nu chi ga'na escrito, porqui'ni yala rebata' le de rudàliani le ttu le nna rutsibi le attu le nna.

<sup>7</sup>Lu' nna, nuni beni acca chi té adí capacidad qui' lu' tì'chu attu nu huaya' cá. Biani capacidad nu chi té qui' lu' gul-laniā ttùbā cá. Itute nu chi té qui' lu', pues Tata Dios nna yā benna bée qui' lu'. Acca, biánica rebata' lu' ti'atsi lahuábí guyi' lu' a lo ná' nuyā enne' huaya' ni'i.

<sup>8</sup>Cani le qui'ni yala chì tsa' le álá. Parece qui'ni labiru biyā capacidad reyàtsani le le' iglesia qui' le. Tsí álahua chi rigú'ubia' le sin intu' cá. Pues yala edácca'ni tu' canchu hualigani chi rigú'ubia' le, para qui'ni a'hua intu' nna cu'úbia' huá tu' lani le. <sup>9</sup>Pero intu' ca apóstol nna, tì' càte' qui'ni Tata Dios nna

chi benie disponer qui'ni ccá tu' nu bitola ti'atsi ná tu' sentenciado para gatti tu' ru'a lo ca enne'. Itute yétsiloyu nna rinna'aq̄ intu', a'hua ca ángeli nna rilá' huáni cabi intu' ti'atsi ná tu' ca preso nu bedaxu' ca enne'. <sup>10</sup>Rinna' cā intu' ti'atsi yala necio ná tu' porqui'ni cca tu' padecer por Cristua. Pero lebi'i nna cani le qui'ni yala enne' de la ritelíni tsè' ná le. acca rena le qui'ni labí caduel·la' cca le padecer por Cristua. Intu' nna ná rù tu' débil, pero lebi'i nna yala tsìttsi chi tse'e le según la' rulábalatsi' qui' le hàsta qui'ni ca enne' nna rudàliani cā le, pero intu' nna rutsìbi bá cā intu'. <sup>11</sup>Iyé vuelta chi beyà'na tu' sin go, a'hua ribitsi bá tu' inda, casi labí té biya gaccu' tu' a'hua riyà' huá tu', a'hua labí ná gaña ga'áthi tu'. <sup>12</sup>Yala chì ra' tu' lo tsina nu caduel·la' guni tu' para ccani tu' sostener. Ruduadí' ca enne' intu', pero recàbi lání tu' cā lani titsa' tsè!. Rudàxu' cā intu' nna ribèqquia cā intu' fuera yétsi, pero ruchia bá tu' iyaba la' ritè qui' tu'. <sup>13</sup>Riyé' cā iqquia tu', pero intu' nna runi tu' duel·la' eyacca tsè'la tu' cā. Para yétsiloyu nna chi ná tu' tì'a ttu cosa nu labiru riyu' sino para irù'na cā na ti'atsi ná tu' ttu cosa tsígá'. <sup>14</sup>Rudánia' le ca così, pero aláa para qui'ni ettú'ni le, sino para qui'ni inénia' le de chi ná le yì'nia' canu catsi'í te'.

<sup>15</sup>Canu ná cā encargado para guyu cā le, làcā nna ná huá cā ttùba lani Cristua, màsqui'ba iyé cabi tse'e, xiaba hàsta ttu tsìi mili' cabi, pero labí tse'e iyé tàta qui' le. Yà'la tè inte' por mandado qui' Cristo Jesús gutixa'ánia' le titsa' nu cca

qui'e, acca inte' teruba ná' tàta qui' le, lebi'i nna ná le yì'nia'. <sup>16</sup>Acca rinábania' le qui'ni guni le tì'a runia' para ccá huá le tì'a ná'. <sup>17</sup>Por nui nna chi guthél·la'a' Timoteo làti tse'e le porqui'ni ná bi yì'ni to' quia' dèsdeba beni bi aceptar Cristua lani inte', yala al tanto dua bi para guni bi e servir. Timotéua nna guluè'ni bi le ti'yā ridà ya' lo néda qui' Cristua. Quixá'ani bi le ca enseñanza nu riquixa'ánia' iyaba ca iglesia gaña tediba anta' cā. <sup>18</sup>Tuchùppa le nna yala redácca'ni le porqui'ni rulaba latsi' le qui'ni nunca hua làa itárua' làti tse'e le. <sup>19</sup>Pero primero Dios nna pruntu taá itá' làti tse'e le. Làniana ccá' saber acerca de canu yala rebata' cā entre lebi'i. Labí calátsa'a' iyeni te' ca titsa' nu rinne cā, sino para ccá' saber canchu ca hecho qui' qui' rulue' cā qui'ni té la'huacca espiritual qui' qui'. <sup>20</sup>Porqui'ni poder qui' la' rigú'ubia' qui' Tata Dios nna labí rilá'ní por ca titsa' el·la nu rinne ttu enne', sino tsua' teruba por la'huacca qui' Espíritu Santo lani a. <sup>21</sup>Biala téq le cuenta. Tsí itá' lani yà dítí, o tsí itá' lani la' tsí'ílatsi' áccá.

**5** Chi bina ca enne' qui'ni hualigani dua entre lebi'i ttu nu rìdualàniq̄ attu nu huaya' nu labí ná tsèlj. Nìhua canu labí ríalatsi' nna nìdiruani làa runi cā permitir luetsi túl·la'a' qui'ni nuya ttu enne' rìdualàniq̄ niula qui' tàta quì'ì. <sup>2</sup>Átsi'ini lebi'i nna rena le qui'ni yala la' ritelíni chi té qui' le. Dàni le ehuiní' lání le nna ebèqquia le nu rigú'u falta' fuera. <sup>3</sup>Inte' nna màsqui'ba lanúá' té lani

le, pero por medio de la' rulábalatsi' quia' nna chi dú'a' presente lani le. Acca ti'atsi chi dú'a' lani le nna chi becu'a' castigo nu cca merecer nu rigú'u falta'. <sup>4</sup>De chi betùppa le, a'hua inte' lani le por medio de oración quia', lígúni juzgar túl-la'á' por autoridad nu runna Xana' Ri'u Jesucristua qui' le. Lèe nna du huéé lani le lani poder, <sup>5</sup>para qui'ni nu rigú'u falta' nna ccá padecer latsi' ná' Satanas nna làa guniá seguir túl-la'á', para qui'ni espíritu qui' nna l-lá canchu chi él-lani Jesús enne' née Señor lo iyate. <sup>6</sup>Labí ná tsè' qui'ni runi le la' bata' qui' líá' rena le qui'ni yala ca enne' rialatsi' chi ná le. Tsí álahua chi yù le qui'ni titó' rúbá levadura rudâyiluá ituba cúá. <sup>7</sup>Acca bíttúru guni le seguir lani ca tul-la' nu chi beni le ttu cuaýa nuá, sino ná qui'ni gúlue'ní qui'ni chi ná le enne' cubi qui' Tata Dios para làa gudète' le ca hermano, porqui'ni Cristua nna chi uccue sacrificar lo curutsia por ri'u, tì'a carneru to' nu beni ca tà' tàta qui' tu'a sacrificar. Acca té huá pascua qui' ri'u para guni ri'u a celebrar tulidàba. <sup>8</sup>Labí gutó cabi ettaxtíla nu chixi levadura tiempo de pascua qui' caniá. A'hua ri'u nna bittu ná tsè' ichìxi maldad le' la'labàni cubi qui' ri'u, ñihua vicio nna, sino ttu ttu tsa ri'u ná qui'ni éxalatsi' ri'u e lani ttu la'labàni nàri según nu ná lí. <sup>9</sup>Lo carta nu bediánia' le ttu cuaýa nuá nna, nia' qui'ni bittu guttsa' amigo le lani canu rìdualàni ttu nu labí ná tsèla qui'. <sup>10</sup>Bittu nia' le qui'ni de una vez tè l-lá'a le ca incrédulo canu rìdualàni nu huaya', o canu rìdàlatsi' gata' iýeni bel-liu

qui' qui' por la'a làba ça o ca ubàna, o canu té biya creencia ni qui' qui' acerca de ca ídolo. Porqui'ni cáalá nia' le qui'ni de una vez tè l-lá'a le ca incrédulo canu runi ca túl-li'i, entonces té qui'ni íria le le' yétsiloyu'. <sup>11</sup>Sino qui'ni bedía lánia' le qui'ni bittu guttsa' amigo le nuya rena qui'ni ná hermano pero rìdua ba làniá attu nu huaya', o rìdàlatsi' gata' iýeni bel-liu qui' por la'a làba, o runi rùá seguir biya creencia nu cca qui' ca ídolo, o nu huil-la cuentu, o borracho, o ubàna. Nuya rena qui'ni ná hermano pero runi rùá biya ca cosa', pues ñìdiruba làa l-lání li a lo meya qui' le ñihua lebi'i làti ruá. <sup>12</sup>Porqui'ni, biani derechu ní té quia' para gunia' corregir ca enne' labí rialatsi'. Labí ná para quitta' ri'u ça por ca cosa mal nu runi ça. Pero canu ná creyente lani iglesia nna pero rigú'u ça falta nna, tsí álahua ná qui'ni guni le ça corregir cá. <sup>13</sup>Porqui'ni canu labí ná ça parte lani iglesia nna, pues Tata Dios nna gunie ça juzgar. Acca lebèquua malváduá' le' iglesia qui' le.

**6** Canchu nuya ttu le té biya disgustuní entre lebi'i ba, biecca reyáýani le dia le ru'a lo ca uxticia para qui'ni ithàlia ça juicio qui' le ñi'i. Dàni le tsía la le ru'a lo ca enne' qui' Tata Dios. Tsí álahua chi yù le nui ñi'i. <sup>2</sup>Ca enne' qui' Tata Dios nna ná qui'ni guni ça juzgar yétsiloyu tiempo nu chì da'la. La'a mísmuba lebi'i nna guni le yetsiloyu juzgar, acca tsí bihua capaz ná le anna para cuequua lèttia le biya cosa xcuichu to' nu ril-lani lani le cá. <sup>3</sup>Pues hàstaá ca



ángel nna ná huá qui'ni guni ri'u cabi juzgar. Tsí labí adí telá derecho té qui' le anna para cuequia lètti le ca problema nu rittè ba le le' yétsiloyu cá. <sup>4</sup>Entonces, biecca rugàl-la' le ca enne' canu labí té parte qui' qui' le' reunión para guni ca arreglar ca problema nu rittè ba le le' yétsiloyu cá. <sup>5</sup>Nia' le ca cosí para qui'ni xiaba ehuini'ni le. Tsí núhuá té entre lebi'i nu té la' ritelíni suficiente qui' para gutsch'e tsí'á chùppa hermano canu ritil-la ca. <sup>6</sup>Sino dia la le para qui'ni ithàlia ca enne' juicio qui' le nna ritil-la ttu hermano contra attu hermano ru'a lo ca uxticia. <sup>7</sup>Acca hualigani chi ná ttu escándalo nu runi le, porqui'ni la'a mísmuba lebi'i nna yù'u le pleito ttu le lani attu le dacca'ló taá. Tsí labí ccani le thí' tí' le la'yeni para qui'ni làa itsa'áni le biya runi ttu enne' contra lebi'i. Tsí ñihua làa ruchia tí' le làa édi' le yèe' canchu nuya rudacca'yí'á le nna ridi'á biya té qui' le. <sup>8</sup>Pero la'a mísmuba lebi'i nna ruduadi' taá le entre lebi'i, a'hua ruthacca'yí' taá le para thí' le biya té qui' ca enne' hàstaá qui' ca hermanos qui' le <sup>9-10</sup>Ca enne' canu labí dianó ca runi ca nu ná tse' delante de Tata Dios, làca nna labí nàl-la' èl-la' ca gata' parte qui' qui' làti rigú'ubi'e. Tsí labí chi yù le nui cá. Bittu thacca'yí' le, porqui'ni ñihua canu ridualàni ca attu nu huaya', ñihua canu rúniíru ca seguir biya creencia qui' qui' acerca de biya imagen, ñihua ca enne'yu' canu runi ca entre làba ca nu labí ná qui'ni guni ca, ñihua canu ribána, ñihua canu ridàlatsi' qui' gata' i'eni bel'liu qui' qui' por

la'a làba ca, ñihua ca borracho l-le, ñihua canu huil-la cuentu l-le, ñihua canu riguabàni ba ca biya lo ná' ca enne' l-le, pues iyaba ca nuq' nna labí nàl-la' èl-la' ca gata' parte qui' qui' làti rigú'ubia' Tata Dios. <sup>11</sup>Ca túl-li'i nna beni ba ttu te le ttu cuaya nuá. Pero Tata Dios nna chi bèyie le nna chi beduyètsi'e le para ccá le enne' nàri, a'hua chi benie qui'ni labiru cca le condenar. Iyaba ca favor nà' beni Tata Dios para lebi'i por medio de Xana' Ri'u Jesucritua a'hua por medio de Espíritu enne' guthèl-le'e.

<sup>12</sup>Rena ca enne' qui'ni iyábani ca cosa huacca ba guni ri'u ca, pero inte' nna nia' le qui'ni aláa iyá ca cosa táliq' ri'u tsè'. Té huá libertad quia' para gunia' iyábani ca cosa, pero ñidi ttuq' làa hue'él-la' ya' a' gunia' inte' dominar. <sup>13</sup>Ca alimento nna nà para lè'e ri'u, a'hua lè'e ri'u nna ridàlatsi'i alimento, a' rena ca enne'. Pero Tata Dios nna gunie qui'ni labiru i'yu' chùppa taá ca. Cuerpo qui' ri'u nna álahua nà para guni ri'u ca cosa cùttsi, sino ná lq' para guni ri'u nu rú'ulatsi' Señor, a'hua lèe nna née para cuerpo qui' ri'u. <sup>14</sup>Tata Dios enne' chi bechithe cuerpo qui' Señor Jesucristua de lo lù'uti, a'hua ri'u nna echitha huée cuerpo qui' ri'u de lo lù'uti lani la'a mísmuba la'huacca qui'e. <sup>15</sup>Tsí labí yù le qui'ni lebi'i canu ríalatsi', pues ná huá le parte lani cuerpo qui' Cristua. Tsí hua ná tsè' canchu ttu enne' nu chi nà parte lani Cristo, pero gúttsa'a' cuerpo qui'i lani ttu niula nu reqquia hueni negocio lani cuerpo qui'i cá. <sup>16</sup>Ttu nu ruttsa'a' lani ttu luetsi

niula máluʔ, entonces cuerpo quiʔi nna ná parte lani la. Porquiʔni tì'a chi ra lo Escritura: Chùppa cʔ ccá cʔ ttùba cuerpo. <sup>17</sup>Pero ttu enne' nu ribíga'ʔ lani Señor nna, entonces chi ná ttùba lani e por espíritu. <sup>18</sup>Liucùttani iyaba clase de tentación nu runi quiʔni thualàni le attu nu huaya'. Porquiʔni bíyaa'ru attu clase de túl-la' ní nu runi ttu enne' nna bihua runiʔ quiʔni cuerpo quiʔi ítsa'ʔ attu nu huaya'. Pero nu rìdualàni nu labí ná tsèlì, ʔ' modo runiʔ tul-la' contra la'a làba. <sup>19</sup>Tsí bihua yù le quiʔni cuerpo qui' ttu ttu tsa le nna chi ná yú'u qui' Espíritu Santo enne' chi dua lo losto' le, porquiʔni Tata Dios nna guthèl-le'e bi para lebi'i. Lèe nna chi nées Xana' le álaáru la'a mísmuba lebi'i. <sup>20</sup>Yaʔi tsè'ni chi yó'oni Señor le. Acca ligúni nu rú'ulatsi'e lani itute cuerpo qui' le ʔ'hua espíritu qui' le, porquiʔni qui' bée ná le. Anía modo nna edácca'ni Tata Dios por lebi'i.

**7** Annana ecabínia' lo acerca de ca cosa nu chi gunàbani le inte' por medio de carta. Tsè'ba ná para ttu nubeyu' canchu bittua thí'ʔ niula. <sup>2</sup>Pero para quiʔni bittu innia le le' tentación nna, adila tsa' quiʔni ttu ttu le thua niula qui' le, ʔ'hua quiʔni ttu ttu niula nna thua nubeyu' qui' qui. <sup>3</sup>Nu chi bettsaní'ʔ nna dàniʔ quiʔni ítsa'ʔ niula quiʔi tì'a ná deber quiʔi, ʔ'hua niula lani tsèlì. <sup>4</sup>Ttu niula nu chi bettsaní'ʔ nna labí té derecho quiʔi cu'úbi'ʔ cuerpo quiʔi, porquiʔni chi ná para nubeyu' quiʔi. ʔ'hua nubeyu' nu chi bettsaní'ʔ nna labí té derecho quiʔi cu'úbi'ʔ cuerpo quiʔi, porquiʔni chi

ná para niula quiʔi. <sup>5</sup>Bittu cuàni voluntad qui' luetsi le, solamente canchu inne lèttia le quiʔni bittu ítsa' tē luetsi le por ttu tiempo para quiʔni ibíga' le adí exa lani Tata Dios por oración. Pero liutsà' luetsi le attu, porquiʔni xiaba labí guchia le adí nna innia le le' tentación latsi' ná' Satanás. <sup>6</sup>Nia' nui, aláa para guthísinia' le, sino quiʔni ná ttu consejo para lebi'i. <sup>7</sup>Quisiéra lá inte' quiʔni iyaba ca enne' nna ccá cʔ tì'a ná yi'ʔ. Pero Tata Dios nna chi betie ttu capacidad qui' ttu ttu tsa ri'u. Ttuʔ nna té ttu capacidad quiʔi, áttuʔ nna té ttu capacidad nuhuaya' quiʔi. <sup>8</sup>Lebi'i ca soltero nna, ʔ'hua iyaba canu chi gùtti tsèla qui, riquixa'ánia' le quiʔni adila tsa' thua ttùba le tì'a inte' dua ttùba'. <sup>9</sup>Pero canchu ruthácca'bia' latsi' le quiʔni bihua guchia le thua ttùba le nna, entonces líuttsa teláná' le. Pues adila tsa' guttsaná' le tì'chula gulábalatsi' le tulidàba acerca de ca cosʔ. <sup>10</sup>Pero lebi'i canu chi bettsaná', nia' le por mandado qui' Señor: Labí ná tsè' quiʔni ttu niula gutse'e latsi'ʔ nubeyu' quiʔi. <sup>11</sup>ʔ'hua ttu niula nu chi betse'e latsi'ʔ nubeyu' quiʔi, pues dàniʔ eyacca tsè'ʔ nubeyu' qui' niá ttu nna bittu gudua iqqi guttsaní'ʔ lani attu nubeyu' huaya'. ʔ'hua ttu nubeyu' nu chi bettsaní'ʔ nna bittu ná quiʔni éla'ʔ niula quiʔi. <sup>12</sup>Pero attu te le nna, alaáruhuá Señor bíyā rēe, sino quiʔni inte' nna nia' le: Canchu nuʔya ttu hermano duʔ lani ttu niula nu labí ríalatsi'ʔ, pero niuláa nna rú'u bá latsi'ʔ guniʔ seguir lani nubeyu' qui' niá, entonces hermánua nna bittu ná

qui'ni éla'á niula qui' niá. <sup>13-14</sup> A'hua canchu nu'ya ttu niula ríalatsi' duá lani ttu nubeyu' nu labí ríalatsi', pero nubéyu'a nna rú'u bá latsi'í guniá seguir lani niula qui' niá, entonces niuláa nna bittu ná qui'ni gutse'e latsi'í na, porqui'ni nubeyu' nu labí ríalatsi'a nna chi ná yà'latsi' para Tata Dios porqui'ni niula qui' niá nna chi ríalatsi'í. A'hua niula nu labí ríalatsi'a nna chi ná yà'latsi' para Tata Dios por nubeyu' qui' niá. Cáalá labí ná a' nna, entonces ca yí'ni le nna ttúbí bá ca lani ca creencia qui' yétsiloyu, pero annana chi ná ca yà'latsi' para Tata Dios. <sup>15</sup> Pero canchu éda' nu labí ríalatsi'a nna, entonces be'èl-la' bá éyya. Porqui'ni canchu éda'a nna entonces hermano o hermana qui' rí'ua nna labiru ná obligado lani a, porqui'ni gutàyi Tata Dios ri'u para tsé'e ri'u lani la'yeni. <sup>16</sup> Porqui'ni lu' niula nu ríalatsi', ti'ani modo yù lu' qui'ni xiaba ccá bá nubeyu' qui' lu' salvo por medio de lu' nì'i. A'hua lu' hermano, ti'ani modo yù lu' qui'ni xiaba niula qui' lu' nna ccá bá salvo por medio de lu' cá.

<sup>17</sup> Ttu ttu tsa le ti'i'ya ná bá capacidad nu chi benna Señor qui' le, a'hua ti'i'ya ná bá le loti' Tata Dios nna gutàyie le, a' bá ga'na le. Nui ná nu calátsa'a' qui'ni guni iyaba canu ríalatsi' ga'ya tediba retùppa ca. <sup>18</sup> Nu'ya ènne'yu' nu chi ná circuncidado loti' gutàyi Señor na, pues bittu ná qui'ni guniá duel-la' qui'ni itùa márcaá de rulaba latsi'í qui'ni a' modo nna ccá ttu nu ríalatsi' adí tsè'. A'hua nu'ya ènne'yu' nu labí márcaá chi té látì loti' Tata Dios gutàyie na,

pues bittu ná qui'ni guniá duel-la' ccá circuncidar. <sup>19</sup> Porqui'ni para lani Tata Dios nna labí bi'ya dacca' canchu ttu nu ríalatsi' té marca de circuncisión látì o canchu labí. Nu dacca' adiru nna ná qui'ni guni la ri'u nu ná voluntad qui'e acerca de iyaba nu ná tsè'. <sup>20</sup> Ti'i'ya tabá ná le loti' gutàyi Señor le, a' bá egà'na le. <sup>21</sup> Tsí chi ná lu' bajo la' rigú'ubia' qui' ttu huexána' loti' Señor gutàyie lu'. Pues bittu nùyue thu lu'. Pero canchu irialàni lu' thí' lu' derecho de libertad qui' lu' nna, entonces adila tsa' bíttuúru cca lu' esclavo. <sup>22</sup> Porqui'ni nu'ya tediba nu chi nàyi para ccá ttùba lani Señor màsqui'ba chi ná esclavo le' yétsiloyu pero chi bedilèe na le' ca tul-la' qui'í, acca annana chi ná ttu enne' libre ru'a lo Señor. A'hua nu'ya tediba enne' nu té libertad civil qui'í loti' Tata Dios gutàyie na pero annana Cristo née xàni'í, entonces la' nna ná esclavo ru'a lúe tulidàba. <sup>23</sup> Porqui'ni ya'yi tsè'ni chi yó'onié lé, gùttie por lebi'í para qui'ni cca le enne' qui'e. Acca bittu guni le nu càba latsi' ca enne' canchu labí ná nu rú'ulatsi' Señor. <sup>24</sup> Ttu ttu tsa le hermanos, ti'i'ya tabá ná le loti' Tata Dios gutàyie le, a' bá guni le seguir, porqui'ni annana dua Señor lani le para gunie le cualàni.

<sup>25</sup> Annana ecábínia' le acerca de canu dua ttùba ca. Bihua bi'ya mandamiento ni chi benna Señor lani inte' para làca, pero por la' retúalatsi' qui'e lani inte' nna càte' qui'ni té la' riyeni tsè' quia' para quíxa'a'. <sup>26</sup> En vista de qui'ni yala peligro dù lo ri'u annana, acca càte' qui'ni adila tsa' qui'ni lu' nubeyu'

bittu etsiání lu' de nu chi ná lu'. Por ejemplo: <sup>27</sup>Lu' nu chi bettsaná' lu', pues bittu gudua iququia lu' éla'a lu' niula qui' lu'. A'hua lu' nu dua ttüba lu', pues bittu hué'latsi' lu' guttsaná' lu'. <sup>28</sup>Iyaba le canu labí chi bettsaná', canchu cueqquia latsi' le guttsaná' le, pues bihua ná tul-la'. Pero riquixa'ánia' le qui'ni canu guttsaná' qui' nna huátta' adí ca problema qui' qui'. Quisiera la inte' qui'ni làa ìnnia le le' ca problémaá anna tè. <sup>29</sup>Porqui'ni tiempo nu tse'e rí'uij nna, chi' taáduq ìl-lani fin qui'í. Acca dèsdeba annana, lebi'i canu dua niula qui' le nna, bittu gulaba latsi' le puro taá qui' bá qui'. <sup>30</sup>A'hua lebi'i canu chi ribétsi, pues dèsdeba annana bittu gulaba latsi' le puro taá la' tristeza qui' le. A'hua lebi'i canu té la' redácca' latsi' qui' le, bittu gulaba latsi' le puro taá la' tsè' nu gutté le. A'hua lebi'i canu rò'o le biya, bittu gulaba latsi' le qui'ni labí ítuq. <sup>31</sup>Iyaba le canu runi aprovechar biya té, pues bittu gúttèbà' le demasiádu telá ca cosa qui' yétsiloyu, porqui'ni iyaba nu ná yétsiloyu annana chà rittè qui'í. <sup>32</sup>Calátsa'a' qui'ni bittu tsé'e le nùyue por ca cosa qui' yétsiloyu. Ttu soltero nna libre ba ná para huí'q néda qui'í guniá Señor Jesucristua servir nna guniá adí nu rú'ulatsi'e. <sup>33</sup>Pero ttu nu chi bettsaní'í nna, yala nùyue caniq por ca responsabilidad nu té qui'í le' yétsiloyu, a'hua reyilà néda para guniá nu rú'ulatsi' niula qui'í. <sup>34</sup>A'hua yétsi' bá ná la' rulábalatsi' qui' ttu niula nu dua ttüba, a'hua ttu niula nu chi bettsaní'í nna. Niula dua ttüba nna runi bq duel-la'

guniá nu rú'ulatsi' Señor Jesucristo para qui'ni ccá completamente taá yà'latsi' para lèe tàntua lani cuerpo qui'í a'hua lani espíritu qui'í. Pero ttu niula nu chi bettsaní'í nna adila purari ccá runiq lo sìni nna yala nùyue caniq tiliya guniá nu rú'latsi' nubeyu' qui' niá. <sup>35</sup>Riquixa'ánia' le nui para ccá le saber atitó' tè tsè' acerca de ca cosí, pero álahua qui'ni rutsúna'a' qui'ni nunca labí guttsaná' le, sino para qui'ni ccá le completamente taá ttu siervo qui' Señor nna guni li e servir lani la'yeni.

<sup>36</sup>Canchu ttu tàta dua ttu yi'ni niulí chi rittiq edad para guttsaní'í nna ná de acuerdo lani tàta qui'í nna, entonces ccá bá según la' rulábalatsi' tsè' qui'í, huacca ba guttsaní'í, pues bihua ná tul-la'. <sup>37</sup>Pero canchu ttu tàta re' tsìtsi ba latsi'í qui'ni labí naduel-la' ga guttsaná' yi'ni niá nna porqui'ni hua ná bq dispuesto gúyua na, pues tsè'ba runiq. <sup>38</sup>Acca nu rute yi'ni niulí para guttsaní'í nna, tsè'ba runiq. A'hua nu labí nna, pues adí telá tsè' runiq.

<sup>39</sup>Ttu niula nu chi bettsaní'í nna chi ná obligado thúq lani nubeyu' qui'í de ituba tiempo cabàni nubeyu' qui' niá. Pero canchu nubeyu' qui' niá gattiq nna, entonces libre bá ná niuláa para guttsaní'í atu lani nuya ba calatsi'í, pero siempre lani ttu nu ríalatsi' Señor. <sup>40</sup>Pero nu càba te' nna adí teerulá ica'rubà ttu niula canchu nà' dua bq bittu guttsaní'í. Rulaba látsa'a' qui'ni nu nfyi'í nna dá'q por la'huacca qui' Espíritu enne' guthel-la' Tata Dios.

**8** Annana ecábina' le acerca de nu rutsia ca enne' ru'a lo ca

ídolo, canchu hua ná tsè' go ttu enne' chi ríalatsi' na o canchu labí áccá. Rena le qui'ni chià té la' ritelíni qui' le acerca de nui. Pero inte' nna nia' le qui'ni canu rulaba latsi' qui' qui'ni iyábani chi yù cã nna, pues làcã nna rulaba huá latsi' qui' qui'ni yala enne' dacca' ná cã. Pero canu té la' tsí'ílatsi' lo losto' qui' nna hualigani rue' cã fuerza espíritu qui' adí ca enne' ríalatsi'. <sup>2</sup>Canchu nuÿa cania qui'ni yala tsè' chi ritelíniã nna, lã nna labí biÿa yùã tì'a ná qui'ni télíniã. <sup>3</sup>Pero nu hualigani catsi'íniã Tata Dios nna, pues a'hua Tata Dios nna nabia'nie na tì'a ttu amigo exa tsittsi ní qui'e. <sup>4</sup>Acerca de la'gó nu chi betsia ca enne' ru'a lo ca ídolo según creencia qui' qui, chi yù ri'u qui'ni ttu ídolo nna lanú nuÿa ná le' yétsiloyuj porqui'ni lanú attu Dios té sino làteruba lèe. <sup>5</sup>Rulaba latsi' ca enne' qui'ni iyetse' ca dios ná, canu ribèni ÿiaba l-le, canu tse'e le' yétsiloyu l-le, rena huá cã qui'ni hua re' ca imagen qui' qui nu dacca' adí ti'chu attu te cã, a'hua rena cã qui'ni tse'e iyetse' xana' qui. <sup>6</sup>Pero para ri'u nna dua ttu teruba Dios enne' née Tata qui' ri'u, iyaba ca cosa nna uccua cã por lèe. Ri'u nna ná ri'u para lèe. A'hua dua ttu teruba Xana' ri'u, Enni'í nna née Jesucristua; por lèe nna uccua iyaba ca cosa, a'hua bàni ri'u por medio de lèe. <sup>7</sup>Pero álahua iyate ca enne' chi ritelíni cã nui. Porqui'ni ttu te cã nna ùccuabia' teláni cã nu cca qui' ca ídolo, acca canchu go cã nu begua ca enne' ru'a lo ca ídolo nna rulaba latsi' qui' qui'ni ná por ttu dios huaya' nna, acca ná tul'la' para làcã, porqui'ni labí chi ritelíni cã. <sup>8</sup>Nia' le qui'ni:

Nu ro ri'u nna bihua ná nu dacca' guniã qui'ni ibíga' ri'u adí exa ru'a lo Tata Dios. Acca, canchu go ri'u nu begua ca enne' ru'a lo ca ídolos nna, pues labí guniã qui'ni ccã ri'u adí enne' nàri, a'hua canchu labí go ri'u, bihua egà'na menos ri'u. <sup>9</sup>Hua tébã libertad qui' le para go le nu tsia ru'a lo ca ídolo, a'hua canchu bittu ba l-le, pero canchu hua ná tsè' para lebi'í go li a, entonces ná qui'ni hue' le cuidado qui'ni làa ibixi ca hermano qui' le canu labí chi ná tsittsi la' rulábalatsi' qui' qui' acerca de nui. <sup>10</sup>Por ejemplo: lu' nna chi ritelíni lu' nu cca qui' ca ídolo. Pero ttu hermano nu labí chi ritelí tsè' tegánia nna, canchu ilá'niã lu' qui'ni re' lu' go làti tsia ca ídolo nna, tsí álahua càtehua latsi'í gúã nu tsia ru'a lo ca dios fálsua, màsqui'ba rulaba latsi'í qui'ni labí ná tsè' gúã na cá. <sup>11</sup>Lu' gálãa cani lu' qui'ni yala tsè' chi ritelíni lu', pero hermano nu yala cuidado ruí'ã, de rilá'niã nu runi lu' ccã desanimar nna eyeqquia bã attu. Acca labí tsè' runi lu', porqui'ni a'hua por hermanua' nna gùtti Cristua. <sup>12</sup>A' modo nna rigú'u le falta contra ca hermanos qui' le porqui'ni rudùl'la'a de la' rulábalatsi' tsè' qui' qui. Acca contra Cristua nua' runi le tul'la'. <sup>13</sup>Nia' le qui'ni canchu ttu hermano quia' guniã tul'la' contra Señor por causa de inte' qui'ni rúa' bèla' nu chi betsia ca enne' ru'a lo ca ídolo, pues dèsdeba annana labiru gúa' biÿa tabá bèla' ni para bittu guniã qui'ni ttu hermano quia' nna innia le' tul'la'.

**9** Tsí bihua libertad té quia' tì'a nu té qui' le. Tsí álahua chi

bethà'na Cristua latsi' naya' para quixa'a' ca titsa' quì'e tì'a runi adí ca apóstol. Tsí álahua chi bilá' te' Xana' Ri'u Jesucristua ttu cuaña nuá cá. Tsí álahua chi betsiáni la'labàni qui' le por medio de predicación quia' lani la'huacca qui' Señor cá. <sup>2</sup>Para adí ca enne' nna labí ná' apóstol qui' Señor tì'a adí ca apóstol, pero lebi'i nna yù le qui'ni guthèl'le'e inte'. Porqui'ni lebi'i nna ná le tì'a tu sello nu rului'á autoridad nu benna Señor lani inte' porqui'ni chi ríalatsi' li e. <sup>3</sup>Canu riniyu cã inte' nna recábini ya' cã: <sup>4</sup>Tsí bihua derecho té qui' tu' í'ya go tu' cuenta qui' bá lé cá. <sup>5</sup>Cáalá dua ttu niula quia' nna, tsí bihua derecho quia' té íche' ya' á gaña tediba dí'a' tì'a runi hermano qui' ri'u Cefas á'hua adí ca apóstol nna ca bettsi' Señor nna cá. <sup>6</sup>Tsina nu runia' lani Bernabéa' para ccani tu' sostener nna, tsí intu' teruba bihua derecho qui' tu' té para gudùtsi tu' á cá. <sup>7</sup>Ttu soldado yù'u le' cuartel nna, tsí cuenta qui' bí nu ri'ya ruá para ccabàniá cá. Á'hua ttu nu runi tsina campo nna, tsí álahua ruá lèna' nu reñu' le' loyu qui' niá cá. Á'hua ttu nu tse'le iyetse' ca gù'na bia' qui' nna, tsí álahua riyá leche nu rithiá qui' ca vaca qui' niá cá. <sup>8</sup>Nu níyi'i' nna, tsí làteruba ca enne' rena á' cá. Tsí álahua á'hua rinne lo ley nu benna Tata Dios cá. <sup>9</sup>Porqui'ni lo ley nu bedia Moisés por mandado qui' Tata Dios nna ra:  
 Bittu cù'u lu' exxa rú'a animal to' qui' lu' canchu chi yu'á tsina'.

Biecca ra Tata Dios á' cá. Tsí runie tratar sobre ca animal to' teruba

cá. <sup>10</sup>Pues para qui'ni ccá ri'u saber qui'ni dani ri'u guni tratar luetsi ri'u lani la' tsí'ílatsi', acca ga'na escrito ca titsa'á'. Tì'a ttu enne' runi nãá, pues siempre yénlatsi'í tsina qui' niá, á'hua ttu nu rudánia yúá' nna, yén huá latsi'í édi'á lèna'. <sup>11</sup>Intu' nna, ca titsa' nu chi gùda tu' lo losto' le ná cã para bien qui' espíritu qui' le. Tsí yàl-la' tè iýeni ná para lebi'í canchu quithia le titó' tsa ca cosa material nu té qui' le lani intu' nì'i. <sup>12</sup>Adí canu riquixa'a' cã enseñanza lani le nna, buénubá redi' cã por ca cosa material nu rute le qui' qui'. Tsí álahua adí telá dani tu' inàbani tu' le cá. Pero labí ruthísini tu' le qui'ni gunna ga le qui' tu' tì'ga dani, sino ruchia bá tu' tì'iya díbá ná la' ritè qui' tu' para qui'ni làa eyà'na menos ca titsa' nu riquixá'a tu' acerca de evangelio qui' Cristua. <sup>13</sup>Tsí bihua yu le qui'ni canu ga'na encargado para guni cã tsina le' templua nna hua ná bá qui'ni go cã biya té nía nu ritahua' ca enne'. Á'hua canu runi atender làti rutti cã ca animal to' para sacrificio qui' qui', pues té huá derecho qui' qui' thí' cã go cã. <sup>14</sup>Señor Jesús nna gutixà'a hué qui'ni canu tsía huéquixa'a titsa' nu runna salvación nna té qui'ni ccá cã sostener por tsina nu runi cã por lèe. <sup>15</sup>Pero inte' nna nidi ttu centavo bihua gunábania' le, nihua álahua rudánia' le nui para gunna ga le biya quia' lle. Porqui'ni para inte' nna adila tsè' gattia' tì'ca'la nuya cúa la' redacca' latsi' nu té quia' lo tsina qui' Señor. <sup>16</sup>Lahuábí té qui'ni ebàta'a' de riquixà'a' ca titsa' nu

runna salvación, sino naduél-la' guni ya' a, pues ica'ruítsi'íru inte' canchu labí équixa'a' evangelio lani ca enne'. <sup>17</sup>Cáalá lani voluntad quí'ba' guná'ba'a' tsini para guni ya' a entonces nia' qui'ni cca' merecer thí' là'ya'. Pero runia' Cristua servir porqui'ni lóstu'a' nna ra qui'ni naduél-la' guni ya' a, acca ríquixa'á' evangelio qui'e lani ca enne' pero lani i'ñeni voluntad quia' porqui'ni ttu siervo qui'e ná'. <sup>18</sup>Entonces biálá nua' ná là'ya' cá. Pues ná ttu la' redacca' latsi' para inte' porqui'ni ña ríquixa'a' bá' títsa' de salvación nu runna Cristua nna bihua cuenta guléqquia' ca derecho nu té quia' de runia' predicar títsa' qui'e. <sup>19</sup>Acca bihua ná' bajo nu'ya enne', sino ná lá' libre para cca' esclavo nna runia' iyaba ca enne' servir, con tal de qui'ni nu'yé tsè'ni ca tsíalatsi' qui' ne. <sup>20</sup>Lani ca enne' judío canu runi seguir ca costumbre nu ra lo ley qui' ca tà' tàta quí'ya'a, pues runia' duel-la' ccá' ttùba lani ca, para qui'ni guni ya' ca gana para Cristua. Lani ca enne' qui' adí ca nación canu runi bá ca seguir bajo ley qui' ca enne' judío, pues runi bá' respetar ley qui' qui' tì'a tse'e ca bajo ley, para qui'ni guni ya' ca gana para Cristua, màsqui'ba bihua ná' obligado guni ya' a. <sup>21</sup>Lani ca enne' qui' adí ca nación canu labí nabia'ni ca ca costumbre nu ga'na escrito lo ley qui' Moisés, pues runia' duel-la' ccá' tì'a là'ca, pero bittu nia' qui'ni rutsibia' nu ra lo ley qui' Tata Dios, sino ná' bajo ley qui' Cristua, para qui'ni guni ya' ca gana para lèe. <sup>22</sup>Lani canu yala cuidado rue' ca, runia' duel-la' bittu

gunia' bi'ya nu ná mal para là'ca, para qui'ni a'hua là'ca nna guni ya' ca gana para Cristua. Pues iyate nu ná ca enne' nna runi ba' duel-la' ccá' ttùba lani ca, para qui'ni anía modo nna l-lá màsqui'di ttu te ca enne' le' ca tul-la' qui' qui'. <sup>23</sup>A' runia' para qui'ni ca enne' cnu tse'e le' adí lugar nna gudà naga' qui' ca títsa' nu runna salvación, para qui'ni edacca' huá te' de ilá' te' qui'ni ríalatsi' qui'.

<sup>24</sup>Ca deportista yù'u ttu carrera nna, tsí labí yù le qui'ni iyaba ca nna rigàa ca, pero ttu nna rinèrua nna yà'la là rítsina' ru'a nna ridi'á premio. Lebi'í nna lihue'èl-la' huá latsi' le guni le gana premio nu runna Tata Dios qui' le. <sup>25</sup>Iyaba canu rue'èl-la' latsi' qui' guni ca gana premio nu adiru dacca', pues yala controlar runi ca tulidàba, cuerpo qui' qui' nna ná bajo i'yetse' ca regla para qui'ni guni ca gana lo competencia nna thí' ca ttu corona nu de l-la' nu tsásti taá rihuèthia. Pero ri'u nna adíru cuidado ná qui'ni hue' ri'u para cca controlar la'labàni qui' ri'u, para qui'ni cu'úe iquía ri'u attu corona huaya', ttu corona nu nunca labí l-lu'ya latsi'í. <sup>26</sup>Por nui nna rue'èl-la' hua látsa'a' rigàa', alàa tì'a canu rigàa nì cuenta bá, pues rue'él-la' látsa'a' para gunia' gana, labí ná' ttu nu nì cuenta bá ruthàna b'á lo be'. <sup>27</sup>Sino runia' dominar la'a mísmuba cuerpo quia' para qui'ni ccá bajo la' rigú'ubia' quia' nna guni nu ná tse', para qui'ni después de chi gutá'yinia' adí ca enne' qui'ni gá'a ca le' carrera', la'a mísmuba inte' nna làa eyà'na' fuera.

**10** Lebi'ì hermanos, ruréxa'a' latsi' le nu uccua lani ca enne' Israel tiempo antigua, loti' gutsché cabi le' desiértuá. Iyaba cabi nna gudà' cabi le' ÿula qui' ttu bía nu guthèl-la' Tata Dios para làcabi. A'hua iyaba cabi nna guttè cabi le' indatò' nu láa Mar Rojo. Tata Dios nna guthàlie ttu néda le' indatù'a para uccua guttè cabi, <sup>2</sup>ti'atsi uccua cabi bautizar por Moisés le' bía nna le' indaá nna, anía modo belue'ni qui'ni ná cabi enne' qui' Moisés. <sup>3</sup>A'hua iyaba cabi nna gutò cabi ttùba alimento nu binnia de ÿiaba, anía modo nna beni Tata Dios cabi alimentar. <sup>4</sup>A'hua iyaba cabi nna ttùba gu'ya cabi inda, inda nu gul-lani le' ttu íyya por milagro qui' Tata Dios enne' gùdue lani cabi tulidàba. Íyya làti biria indaá nna uccua Cristua. <sup>5</sup>Pero por ca tul-la' nu beni nuÿetse' ca nna labí guyú'u latsi' Tata Dios, acca por castigo nna gùtti telá ca nía. <sup>6</sup>Nu uccua lanía nna ná ttu ejemplo para ri'u canu tse'e anna, para qui'ni làa thálatsi' ri'u biÿa ca antojo mal tì'a beni ca tiempo lanía. <sup>7</sup>A'hua bittu guduÿíbi le ru'a lo ca ídolo tì'a beni ttu te ca tiempo lanía, tì'a ra lo Escritura:

Làca nna guÿuaní ca gù'ya gutò ca,

Làniana bedulí ca nna yala bedacca' latsi' qui' ru'a lo ca ídolo qui' qui'.

<sup>8</sup>A'hua bittu cca ri'u adúltero tì'a beni ttu te ca lanía, acca Tata Dios nna benie ca castigar, pues le' ttu tsá teruba nna gùtti tsúnna erua' mili' ca. <sup>9</sup>A'hua bittu gutsa'áni ri'u iiquia Tata Dios tì'a beni attu te

ca lanía, hasta qui'ni beni ca ne prueba canchu hua té paciencia qui'e. Acca por nui nna guthèl-le'e attu castigo qui' qui' nna nuÿetse' ca gùtti nía porqui'ni gutitsi' bèl-là ca. <sup>10</sup>Bittu inne le contra Tata Dios tì'a beni ttu te ca, labí beyà'na ca conforme lani iyaba nu betie qui' qui'; acca por mandado qui'e nna bèttì ttu ángel nuÿetse' ca.

<sup>11</sup>Iyaba nu guÿacca' ca tiempo lanía nna ná ttu ejemplo para ri'u, acca chi ga'na ca escrito lo ittisi para ccá le saber qui'ni labí ná tsè' guni ri'u tul-la', yà'ni qui'ni ná qui'ni guthète' ri'u por ejemplo qui' canu gutsché ca antes. <sup>12</sup>Acca canchu nuÿa rulaba latsi'ì qui'ni yala tsittsi chi duá, pues ná qui'ni huí'á cuidado qui'ni làa inniá le' tul-la'. <sup>13</sup>Iyaba ca prueba canu ril-lani lani lebi'ì nna tulappa bá ná ca tì'a ril-lani lani iyaba ca enne', pero Tata Dios enne' dù lani lebi'ì tulidàba nna labí guthàna né'e le íl-lani ttu prueba xeni nu labí thá le lani a. Sino la'a mísmuba hora qui'ni ccá le tentar nna ithalie ttu néda qui' le para qui'ni l-lá le le' tentación nna guni le vencer iyate nu ná mal. <sup>14</sup>Acca lebi'ì ÿa hermanos quia', liucuttani iyaba clase de creencia nu cca qui' ca ídolos. <sup>15</sup>Enne' ritelí báni ná lé, acca hua té capacidad qui' le para gucué' le qui'ni nu inni yì'ì nna ná tsè'.

<sup>16</sup>Canchu chi runi ri'u celebrar Cena qui' Señor nna rinàba ri'u bendición de ridi' ri'u vásuá, tsí álahua anía modo nna ccá adí ttùba la' rulábalatsi' qui' ri'u por réni nu belàlia Cristua lo curutsia



loti' gùtti áa cá. A'hua ettaxtíla nu ril'la'a ri'u, tsí álahua a' modo nna ridi' ri'u ttùba bendición por medio de cuerpo qui' Cristua loti' uccue padecer por ri'u cá. <sup>17</sup>Màsqui'ba iyetse' ri'u ná, pero iyaba ri'u nna ro ri'u ca pedazo to' qui' ttùruba ettaxtílaá, a' modo nna rulue'ní qui'ni ná ri'u parte lani cuerpo qui' Cristua. <sup>18</sup>Ca enne' Israel nna, de ridi' ca qui' sacrificio nu tsia lo altar qui' cania para go ca na, ania modo ná ca ttùba lani nu runi altar representar. <sup>19</sup>Biani nuá cca te' inniá' cá. Tsí ina ri'u qui'ni ttu ídolo nna ná ttu dios cá. Tsí ina ri'u qui'ni bèla' nu rutsia ca enne' ru'a lo ttu ídolo nna runiá biya nu dacca' para làca cá. Nì ttùhua ca cosj. <sup>20</sup>Pero inte' nna nia' le qui'ni iyaba ca sacrificio nu tsia lo altar qui' canu labí nabia'ni ca Tata Dios, álahua ná ttu ofrenda para lèe, sino para ca espíritu malo la runi ca na. Acca bittu calátsa'a' l-lání le ca espíritu malo. <sup>21</sup>Labí ná tsè' thí' le vaso Cena qui' Señor, canchu ridi' ba le nu tsia ru'a lo ca ídolo, porqui'ni ca ídolo nna ttùba ná ca lani ca espíritu malo. A'hua labí ná tsè' l-lání le lo meya qui' Señor canchu ril'lani huá le lo meya qui' ca espíritu malo. <sup>22</sup>Tsí ina ri'u hueyáyani ri'u guttsa'áni ri'u iquua Señor cá. Tsí adila la'huacca té qui' ri'u tì'chula lèe cá.

<sup>23</sup>Ttu te le nna rena le íj: Iyábani nna huacca bá gunia', té huá libertad quia' para gunia' biya diba calátsa'a'. Pero inte' nna nia' le qui'ni álahua iyaba ca cosa nu runi ca enne' nna ná ca ejemplo tsè' para adí ca enne', álahua iyaba

ca cosa nna cca servir para eyacca ca enne' ccá ca enne' tsè'. <sup>24</sup>Ná qui'ni eyila le ti'iyá modo guni adí ca enne' aprovechar nu ná tsè', aláa tsua teruba nu rú'ulatsi' lu'. <sup>25</sup>Iyábani nu ritó'lo le' ttu carnicería nna, huacca bá gó'lo le nna go li a nna pero bittu inába titsa' le biya lóni'a qui'ni acca bèttiá animal tú'a, porqui'ni labí caduel'la' ccá lu' saber. <sup>26</sup>Porqui'ni ra lo Escritura: Qui' ba Señor ná yétsiloyu, a'hua iyate nu té l'ij. <sup>27</sup>A'hua nuya ttu amigo qui' le canchu gayia le go le litsi'j màsqui'ba labí rialatsi'j nna, pues tsia bá le go le lani a canchu calatsi' le. Iyate nu gunna para go le nna, go ba li a, bittu inába titsa' le biya lóni'a qui'ni benia na prevenido para ccá lu' saber. <sup>28</sup>Pero canchu nuya ca ina ca qui'ni la'gúa nna chia betsia na ru'a lo ca ídolo, entonces bittu go li a para qui'ni làa gudua le ttu ejemplo mal para lani enne' gutáyiá le, a'hua para qui'ni làa iria fuera de la' rulábalatsi' tsè' qui'j. A' ná qui'ni guni le màsqui'ba ra lo Escritura: Qui' ba Señor ná yétsiloyu, a'hua iyate nu té l'ij. <sup>29-30</sup>Nia' le: Bittu go li a, aláa qui'ni lu' nna rulaba latsi' lu' qui'ni ná tul'la' para go lu' a, sino para qui'ni làa ccá lu' ttu estorbo para la' rulábalatsi' tsè' qui'j.

Xiaba nuya ttu le nna ina le: Biánicca cúa lu' libertad quia' para gúa' luetsi la'gúa' ni'i, biánicca caduel'la' gunia' conforme lani la' rulábalatsi' qui' attu enne' ni'i de rue' bá' gracia Tata Dios ántesca go ya' a, biánicca rititse'él'la' ca inte' porqui'ni ro ya' a ni'i. <sup>31</sup>Inte' nna recábini'a' lu' íj: De í'ya go le, a'hua

biya tediba guni le, ná qui'ni gulaba tsè' latsi' le canchu ná para la' dàliani qui' Tata Dios para guni li a o canchu labí. <sup>32</sup>Bittu guni le biya nu runi qui'ni nuya enne' ni innia le' tul-la', ya sea ca enne' judío, ya sea ca enne' qui' adí ca nación, ya sea ca hermano retùppa ca runi ca Tata Dios adorar, <sup>33</sup>tì' tehuá inte' runia' iyaba nu ccá tsè' para bien qui' adí ca enne', porqui'ni labí runia' duel-la' para gunia' por aprovecho quíba' sino reyila' ti'iyá modo gunia' para qui'ni adí ca enne' nna guni ca aprovechar nu ná tsè', para qui'ni a' modo nna l-la' ca.

**11** Liguni huá nu runia', porqui'ni inte' nna runia' seguir ejemplo nu bedua Cristua.

<sup>2</sup>Yala tsè' runi le hermanos, porqui'ni rexa latsi' le iyaba nu chi pá'a' le nna rigua le ca consejo quia' ti'a chi bethéte'nia' le. <sup>3</sup>Pero calátsa'a' télíni le qui'ni Cristua nna née cabeza para iyaba ca enne'yu'. A'hua ca nubeyu' nna ná ca cabeza para ca niula. Tata Dios nna née antes de Cristua. <sup>4</sup>Acca ttu nubeyu' nna canchu yù'u iqquj sombrero de runia oración o de rutiá mensaje qui' Tata Dios, labí tse' rilá'nía para la' dàliani qui' Cristo. <sup>5</sup>Pero ttu niula canchu labí biya rixua iqquj miéntraste runia oración o miéntraste dùa huequixà'a nu cca qui' Tata Dios nna, labí tse' rilá'nía para la' dàliani qui' nubeyu' quì'j. Canchu a' runia, pues ná ti'atsi chi bedá' teláchi iqquj navaja. <sup>6</sup>Canchu ttu niula bihua calatsi'j biya rixua iqquj, entonces biecca làa ichù tè ittsa' iqquj. Pero porqui'ni hua ná ttu la' rettu'ló para ttu niula canchu

ichu ittsa' iqquj o canchu guda' teláchi iqquj navaja, acca adila tsa' ixua biya iqquj. <sup>7</sup>Pero ttu nubeyu' nna labí daniá cu'u iqquj sombrero canchu chi runia oración o de runia predicar, porqui'ni ca nubeyu' nna ná ca adiru ti'a ná Tata Dios, a'hua ná ca para la' dàliani qui'e. Pero ttu ttu niula nna ná para la' dàliani qui' nubeyu' quì'j. <sup>8</sup>Porqui'ni Tata Dios nna benie nubéyu'a, pues labí gul-làniá por medio de niula, pero niuláa lá nna beni Tata Dios na por medio de costilla qui' nubéyu'a. <sup>9</sup>Tata Dios nna benie nubéyu'a, aláa porqui'ni chi dua ttu niula para la, pero niuláa nna uccuá porqui'ni chì lá dù ttu nubeyu' riquiná'niá na. <sup>10</sup>Acca iyaba ca niula nna dani ca ixua iqqua quj, seña de poder qui' ca nubeyu' lani ca niula, porqui'ni tse'e huá ca ángeli rilá'ni ca. <sup>11</sup>Pero ru'a lo Señor nna, tàntua ca nubeyu' riquína'ni ca niula, a'hua ca niula nna riquína'ni ca nubeyu'. <sup>12</sup>Ti'ba niula nérua nna uccuá por medio de nubéyu'a, a'hua ca nubeyu' dèsdeba lanía ràlia ca por medio de ca niula. Pero iyaba ca cosa dá' ca de Tata Dios porqui'ni làbe benie ca. <sup>13</sup>Liulábaáruhuá latsi' le: Tsí hua rulue'ní tsè' canchu ttu niula gunia oración tsàga'a ná bá iqquj cá. <sup>14</sup>Según nu rilá' báni ri'u, tsí álahua yala la' rettu'ló ná para ttu nubeyu' canchu ná tùnna ittsa' iqquj cá, <sup>15</sup>pero para ca niula nna labí, pues ná lã de la' dàliani para la. Ittsa' tùnni iqquj nna ccá servir para ibàga'ní iqquj. <sup>16</sup>Pero canchu nuya bihua rú'ulatsi'j nu gútixa'a' yì'j, pues claru telá nia' le qui'ni bihua attu costumbre huaya' té qui' tu',

nìhua adí ca hermano canu retùppa cabi runi cabi Tata Dios adorar.

<sup>17</sup>Annana rinénia' le sobre de attu asunto huaya', pero labí rul-luítsa' tsí'a' le porqui'ni canchu chi retùppa le reunión nna labí runi le segùn nu ná tsè', sino cca lã resultar mal. <sup>18</sup>Primérute nna chi bína'a' qui'ni canchu chi retùppa le servicio nna, yala pleito té entre lebi'i nna l-la'ání luetsi le. Inte' nna tì' càte' ná hua li ba. <sup>19</sup>Pero caduel-la' qui'ni yètsi' ba cca la' rulábalatsi' entre lebi'i para gúlue'ní nuÿa le hualigani ná le creyente fiel lani Tata Dios. <sup>20</sup>De chi retùppa le ttùba lugar nna, álahua Cena qui' Señor ná nu runi le. <sup>21</sup>Porqui'ni tì'a râl-la' hora ro sé' le, pues ttu ttu le nna rineru taá le nna ridi' tabá qui' tsàba le la'gò qui' lía. Acca ttu te le nna labiru râl-la' le nna ritùni ba le miéntraste attu te le nna ri'ya ro le hàsta qui'ni ritáni le. <sup>22</sup>Tsí bihua litsi' le té làti í'ya go le biÿa té qui' le. Tsí bihua respeto té tí' qui' le le' litsi' Tata Dios, o tsí calatsi' le hué' le la' rettu'ló ca enne' labí téru qui' qui go ca áccá. Ti'ani gul-luítsa'a' le cá. Tsí gul-luítsa' tsí'a' le cá. Pues, sobre de asuntuÿ nna labí gudàlianía' le.

<sup>23</sup>La'a mísmuba nu chi bidèti'a' lani Señor Jesucristua, á' bá chi belué'ni'a' le. Yèlà loti' Judas Iscariote nna betiã Señor cuenta para gattie nna, gũÿi'e ettaxtíla. <sup>24</sup>De beyacca bi'e gracia Tata Dios nna, gùl-le'ée ettaxtílaá nna rèe ca enne' ruthète'ni áa: Lithi' nna ligo, nui nna ná cuerpo quia' para lebi'i. Ná qui'ni guni le nui para éxalatsi' le inte'. <sup>25</sup>Aníahuá gũÿi'e

vásuá de beyacca gutò sé' cabi nna rèe: Vásuÿ nna ná convenio cubi nu runi Tata Dios lani lebi'i por medio de réni quia'. Iyábani vuelta í'ya li a nna guni li a para éxalatsi' le inte'. <sup>26</sup>Porqui'ni iyábani vuelta go le ettaxtíli nna í'ya le nu tá'a le' vásuÿ nna, a' modo gulue' le claru tení ti'íÿa uccua lù'uti qui' Señor, hàsta qui'ni íl-lanie attu.

<sup>27</sup>Acca nuÿa diba gúã ettaxtíli nna i'ya nu tá'a le' vaso qui' Señor nna pero álahua para la' dàliani qui'e, entonces chi ná culpable porqui'ni runiã tul-la' contra cuerpo qui' Señor nna réni qui'e nna. <sup>28</sup>Acca ttu ttu creyente nna ná qui'ni gulaba tsè' latsi'i acerca de la'a mísmuba la'labàni qui'i canchu diã tsè' lani Señor, làniana huacca ba gúã ettaxtíla' nna í'ya nu tá'a le' vásuã' nna. <sup>29</sup>Porqui'ni nuÿa tediba runiã celebrar Cena qui' Señor pero álahua para la' dàliani qui'e, a' modo nna ccã juzgar porqui'ni labí ridi'a ca cosa' lani la' ritelini qui'ni cca ca representar cuerpo qui' Señor. <sup>30</sup>Por nui nna acca iÿetse' le ra'ni nna rigùtsi latsi' le nna, hàsta qui'ni nuÿetse' canu gutsé'e entre lebi'i nna chi gùtti ca. <sup>31</sup>Canchu hualigani ttu ttu tsa ri'u guni ri'u corregir la'a mísmuba ri'u, entonces labiru caduel-la' ccã ri'u juzgar. <sup>32</sup>Pero de runi Señor ri'u castigar nna es porqui'ni calatsi'e gunie ri'u corregir para qui'ni làa nitti ri'u juntamente taá lani yétsiloyu. <sup>33</sup>Áccaÿa hermanos quia', canchu chi retùppa le para Cena nna, licuéda ba luetsi ttu le nna attu le nna. <sup>34</sup>Canchu yàl-la' tè chi ritùni le, pues go ÿa le le' litsi' le, làniana

reunión qui' le nna làa ccá resultar castigo para lebi'i.

Bíyááru ca pregunta té qui' le, guni ya' ca arreglar canchu chi itá' láti tse'e le.

**12** Hermanos, annana nia' le acerca de ca capacidad nu té qui' ri'u por medio de Espíritu Santo. <sup>2</sup>Chi yù le ti'iýa uccua le loti' labí chi huíalatsi' lía, pues tse'e canu bethacca'ýí ca le ti'iýa ba uccua latsi' qui' nna guche' ca le ru'a lo ca ídolo mudo. <sup>3</sup>Por nui nna riquixa'ánia' le qui'ni ttu enne' nu chi dua Espíritu Santo lo lóstu'í nna nunca labí ína qui'ni Jesús nna née maldito. A'hua lanú ccani gudálianíá Jesús nna ína qui'ni née Señor lo iyate canchu núhua Espíritu Santo dù lani a.

<sup>4</sup>Téléá téléá bá ná ca capacidad qui' ttu ttu tsa ri'u, pero la'a mísmuba Espíritu nna gutithie ca lani ri'u.

<sup>5</sup>A'hua yètsi' yètsi' bá ná tsina qui' ttu ttu tsa ri'u, pero enne' gutithie ca capacidad lani ri'u nna née la'a mísmuba Señor. <sup>6</sup>A'hua yètsi' yètsi' bá ridà' tsina qui'e nu runi ri'u, pero enne' runi iyábani ca cosa lo losto' iyaba ri'u nna née la'a mísmuba Tata Dios. <sup>7</sup>Pero la'huacca qui' ttu ttu tsa ri'u nu rulue' qui'ni dua Espíritu lani ri'u nna ná para aprovecho tse' qui' iyaba ri'u.

<sup>8</sup>Espíritu nna chi betie la' riyeni tsè' qui' ttu te ca enne' para gute ca consejo tsè' qui' adí ca enne'. Attu te ca nna chi guýi' ca iýeni la' ritelíni qui' qui' por la'a mísmuba Espíritu para quixá'a ca nu yù ca. <sup>9</sup>Attu te ca nna chi bete la'a mísmuba Espíritu iýeni fe qui' qui'. Adí ca nna té capacidad qui' qui'

para eyúni ca canu ra'ni, por medio de la'a mísmuba Espíritu. <sup>10</sup>Adí ca nna té la'huacca qui' qui' para guni ca ca cosa tàbi por la'huacca qui' Tata Dios. Adí ca nna riquixá'a ca nu yù ca acerca de nu chi' dalla. Adí ca nna té la'huacca qui' qui' para gucué' ca entre ca titsa' nu rinne ca enne' canchu ná ca titsa' lí o canchu ná ca qui' ca espíritu bèyia. Adí ca nna rinne ca adí titsa' huaya' láá lenguas nna. Tse'e huá adí ca té capacidad qui' qui' ethàtsilà'na ca ca tìtsa'a. <sup>11</sup>Pero iyaba ca cosí nna dá' ca por la'a mísmuba ttu teruba Espíritu enne' rithie ca lani ttu ttu tsa ri'u según ti'iýa runi bée disponer.

<sup>12</sup>Ttu enne' nna, ttùba cuerpo ná pero la'a mísmuba cuerpo nna tsia iýetse' miembro qui'í; màsqui'ba iýetse' ca ná, pero iyaba ca nna runi ca formar ttu teruba cuérpua. Á' bá ná Cristua lani ca enne' chi ríalatsi' qui' ne. <sup>13</sup>Porqui'ni iyaba ri'u nna chi ná ri'u bautizado por ttu teruba Espíritu para ccá ri'u pertencer ttùba cuerpo, tàntua ca enne' judío a'hua ca enne' griego, tàntua ca enne' ná esclavo, a'hua canu té libertad qui' qui' lle. Pero iyaba ri'u nna chi gùýi' ri'u la'huacca qui' Espíritu Santo. <sup>14</sup>Ttu cuerpo nna, álahua ná ttùruba miembro, sino iýetse' parte qui'í ná. <sup>15</sup>Cáalá ttu nì'a ri'u nna ína: Labí ná inte' ttu ná', acca labí dàcca'a' para ccá' pertencer lani cuérpuá'. Tsí por a' nna bíruhá ná parte qui' cuerpo qui' ri'u cá. <sup>16</sup>Cáalá naga' ri'u nna ína: Labí ná inte' iyyaló, acca labí dàcca'a' para ccá' pertenecer lani cuérpuá'. Tsí por a'

nna bíruhuá ná parte qui' cuerpo qui' ri'u cá. <sup>17</sup>Cáalá itute cuerpo qui' ri'u uccua puro iyyaló bá nna, biálá lani iyénini ri'u cáalá bihua naga' ri'u té cá. O cáalá itute cuerpo qui' ri'u uccua puro naga' ba nna, gálá dua ÿìna' ri'u cá. <sup>18</sup>Pero alàa a' beni Tata Dios ri'u, sino chi benie iÿé parte qui' cuerpo qui' ri'u nna chi benie disponer gaÿa iÿu' ttu ttu tsa ca según la' rulábalatsi' tsè' qui'e. <sup>19</sup>Cáalá itute ri'u uccua ttùlo teruba, ti'álá modo ccá ri'u ttu cuerpo entero cá. <sup>20</sup>Acca iÿé bá parte beni Tata Dios ri'u, yètsi' yètsi' ba riÿu' ttu ttu tsa ca, pero iyaba ca nna cca ca formar ttu teruba cuerpo. <sup>21</sup>Labí derecho té iyyaló ri'u para gá ná' ri'u: Bihua riquína' te' lu'. Nìhua iquua ri'u nna labí derecho té qui'ì para gá ca nì'a ri'u: Bihua riquína' te' le. <sup>22</sup>Porqui'ni hàstaá ttu te ca parte qui' láti ri'u canu canì ri'u qui'ni bihua riÿu' ca, pues adila riquína' ca. <sup>23</sup>A'hua ca parte nu canì ri'u qui'ni huaÿia' riÿu' ca, pues adila tsè' rue' ri'u ca cuidado. A'hua ca parte nu labí rulue' tsè' tegá, pues tsina nu runi ca nna yala latsitè ná. <sup>24</sup>Pero ca miembro nu hua rilá' bání hermosa nna, bihua biÿa adorno riquína'ni ca. Anía beni Tata Dios ri'u para qui'ni ca miembro qui' cuerpo qui' ri'u nna, màsqui'ba rulaba latsi' ri'u qui'ni labí tanto dacca' ca, pero adila la' dàliani runna Tata Dios qui' qui. <sup>25</sup>Para qui'ni ca parte qui' cuerpo qui' ri'u bittu guni ca ti'atsi bíruhuá attu miembro té qui'ì, acca bedu Tata Dios ttu ttu tsa ca según bá làti iquína' ttu ttu tsa ca. A' modo nna guyu tsè' luetsi qui. <sup>26</sup>Acca canchu

ttu lèttia ná dí' nna, entonces itute huá cuerpo ccadì'a. A'hua canchu ttu parte qui' cuerpo qui' ri'u guniá tsè' ridì'a la' dàliani, entonces itute huá cuerpo qui' ri'u redácca'niá lani a.

<sup>27</sup>Lebi'i nna cca le formar cuerpo qui' Cristua. Ttu ttu tsa le ná le parte lani e por ttu tsina nu guni le. <sup>28</sup>Acca le' iglesia nna chi bedu Tata Dios: Primérute ca apóstol misionero qui'e; làniana ca profeta ca enne' rute ca mensaje para alimento espiritual qui' iglesia; làniana ca maestro ca enne' rethàsilà'na ca ca enseñanza qui' Escritura. A'hua bedùe ca enne' runi ca ca cosa tàbi por la'huacca qui' Espíritu Santo; a'hua ca enne' reyuni ca biÿa tediba clase de tsahue'; a'hua ca enne' runi ca cualàni biÿa cca ofrecer le' iglesia; a'hua ca enne' ná ca responsable para ichè' ca tsina qui'e; a'hua ca enne' rinne ca ca titsa' huaya'. <sup>29</sup>Tsí iyaba ri'u ná ri'u apóstol cá. Tsí iyaba ri'u ná ri'u pastor cá. Tsí iyaba ri'u ná ri'u maestro le' iglesia qui' ri'u cá. Tsí iyaba ri'u té iÿeni la'huacca qui' Espíritu lani ri'u para guni ri'u ca cosa tàbi cá. <sup>30</sup>Tsí iyaba ri'u té capacidad qui' ri'u para eyúni ri'u canu rà'ni cá. Tsí huaccani iyaba ri'u inne ri'u adí titsa' huaya' cá. Tsí huaccani iyaba ri'u ethàsilà'na ri'u ca titsa'a cá. <sup>31</sup>Ná qui'ni guni le duel-la' gata' ca capacidad nu ÿa runna Tata Dios qui' le, pero canu adiru dàcca'. Pero annana gulué'nia' le ttu néda de la'labàni nu ná adí teéruhá tsè'.

**13** Màsqui'ba canchu yala tsè' ccà te' rínnia' iyaba

ca titsa' nu rinne ca enne', a'hua iyaba ca titsa' nu rinne ca ángeli, pero canchu bihua té la' tsì'ilatsi' ló lóstu'a', entonces táliá qui'ni ná' tì'a ttu iyyà nu ril-làbi o ttu campana nu yù'u tsi'j. <sup>2</sup>Màsqui'ba canchu yala tsè' ccà te' runia' predicar titsa' qui' Tata Dios, a'hua canchu ttélí te' iyate ni ca cosa tàbi nu ra lo titsa' qui'e a'hua canchu nabia' te' itute ciencia nna, a'hua canchu té iÿeni fe quia' hasta qui'ni cca te' gunia' mandado ca i'ya qui'ni étsiání cã attu lugar; pero canchu bihua té la' tsì'ilatsi' lo lóstu'a' nna entonces táliá qui'ni lanú nuÿa ná'. <sup>3</sup>Màsqui'ba canchu quíthia' iyate nu té quia' para ccáni nu go ca enne' pobre, a'hua màsqui'bi canchu irialátsa'a' cuerpo quia' para tsáyiã, pero canchu bihua té la' tsì'ilatsi' lo lóstu'a', entonces táliá qui'ni labí biÿa iÿù'a para inte'.

<sup>4</sup>Enne' té la' tsì'ilatsi' lo lóstu'j nna ràppã paciencia lani iyábani, a'hua puru taá tsè'ba runiã tratar ca enne'; labí ràppã la' yélati', ñihua labí rebáta'a, ñihua labí rulaba latsi'j qui'ni yala dàcca'a. <sup>5</sup>Labí runiã qui'ni iyénidí'ni ca enne', ñihua labí dua iqquj nu cca qui' bíj, ñihua labí rittisí'niã, ñihua labí rigua lo lóstu'j biÿa mal nu beni ca enne'. <sup>6</sup>Labí redácca'niã por ca cosa nu labí ná justo, sino redacca' laniã por ca cosa nu ná lí nna, <sup>7</sup>ridi'a la'ÿeni iyábani, a'hua ga'na dispuesto tsíalatsi'j iyábani nu ná lí, a'hua ribèdã iyábani lani la' redacca' latsi'; á' bá ruchia bá iyábani la' ritè qui'j, porqui'ni té la' tsì'ilatsi' lo lóstu'j.

<sup>8</sup>Amor qui' Tata Dios nu té lo losto' ri'u nna, jamás labí étua. Pero

i'yu tsá qui'ni lanuru nuÿa guni predicar de nu chì' da'la, a'hua i'yu tsá qui'ni lanuru nuÿa inne ca titsa' láã lenguas, a'hua iyaba ca ciencia nu nabia'ni ri'u annana tté bá canchu chi i'yu tsáa. <sup>9</sup>Porqui'ni annana ttu parte teruba nabia'ni ri'u, a'hua predicación qui' ri'u nna riquixá'a ttu parte teruba. <sup>10</sup>Pero canchu chi i'yu tsá qui'ni ccá cumplir itute nna, làniana parte to' nu nabia'ni ri'u annana té fin qui'j. <sup>11</sup>Tì'a inte' loti' ná rùà' huatsa tú'a, pues gunnée bá' tì' gáláa ttu huatsa to', a'hua belaba látsa'a' tì' gáláa ttu huatsa to' nna benia' juzgar tì'a ttu huatsa to'. Pero de biÿénia' nna betha'na' iyaba nu benia' de uccua' huatsa tú'a. <sup>12</sup>Hàstaba annana rilá'ni ri'u tì'a ÿúla bá lo huàna', pero i'yu tsá ilá'ni ri'u claru tení. Annana titó' rúbá nabia' te', pero i'yu tsá qui'ni gunibí'a' nu ná lí tì'a nabia'ni Tata Dios inte'. <sup>13</sup>Annana ríalatsi' ri'u, a'hua ribèda ba ri'u lani la' redacca' latsi' por nu chì' da'la, a'hua té la' tsì'ilatsi' lo losto' ri'u. Ca tsúnna cosj: fe nna esperanza nna la' tsì'ilatsi' nna ná cã para siempre. Pero nu adiru dacca' nã la' tsì'ilatsi'.

**14** Liguni duel-la' gata' adí amor qui' Tata Dios lo lósto' le. A'hua liguni seguir lani ca capacidad nu runna Espíritu, pero adí teérolá qui'ni gúnné la'huacca qui' le para quixa'a le mensaje qui' Tata Dios. <sup>2</sup>Porqui'ni de rinne le ca titsa' láã lenguas nna, pues lani Tata Dios teruba rinne le, aláa para qui'ni ca hermanos nna idète' cã, porqui'ni lanú nuÿa ritelíni nu ra le màsqui'ba rinne le

por la'huacca qui' Espíritu Santo ca cosa nu lanú chì yù. <sup>3</sup>Pero de riquixá'a ttu hermano mensaje qui' Tata Dios lani titsa' nu ritelíni ri'u nna, entonces ca titsa' nu rinnia nna riŷu' ca para tsíalatsi' ca enne' a'hua para egú'a ca néda nna gata' adí ánimo qui' quí. <sup>4</sup>Pero de rinne ttu hermano lani ca titsa' nu lanú ritelíni, pues para là terubá rui'a fuerza. Pero ttu nu riquixá'a mensaje qui' Tata Dios lani titsa' qui' ri'u nna, la nna rui'a fuerza itúbani iglesia. <sup>5</sup>Hua calátsa'a' qui'ni inne iyaba le ca titsa' láa lenguas, pero adíruhá calátsa'a' qui'ni quixa'a le mensaje qui' Tata Dios lani titsa' nu ritelíni iyaba le. Porqui'ni ttu hermano nu riquixa'a mensaje qui' Tata Dios lani titsa' nu ritelíni ri'u nna, adíruhá dacca' ca titsa' quí'i para itúbani iglesia tì'chula nu rinne ca titsa' nu lanú nuŷa ritelíni; solamente canchu té huá capacidad quí'i o qui' attu enne' para ethàsilà'nà ca titsa' nu rinnia, para qui'ni ttélíni ituba iglesia nna thí'a adí fuerza.

<sup>6</sup>Ti'a inte' hermanos, canchu itá' làti tse'e le nna innia' ca titsa' láa lenguas nna, biani para ní iŷu' ca titsa' nu inénia' le cá, porqui'ni labí ccani le ttélíni le nu chi belue'ni Tata Dios inte' nna para thí' le ttu consejo tsè' nna iyénini le acerca de ca cosa nu chì' da'la nna gunibia' le ttu enseñanza para la'labàni qui' le. <sup>7</sup>A'hua iyaba ca instrumento de música tì'a ttu flauta o ttu arpa nna, cáalá bihua retsiání tono qui' quí claru taá, ti'ala modo ttélíni ri'u biŷa nuá rul'la ca cá. <sup>8</sup>A'hua ttu corneta nu rucuetsi ttu soldado nna,

canchu bihua yùà gutsiánia' contra seña quí'i, ti'ala modo tsé'e adí ca al tanto para tsía ca lo guerra cá. <sup>9</sup>A'hua lebi'i canchu labí rinnèni le ca hermanos lani ca titsa' nu ritelíni cabi, ti'ani modo gudà naga' cabi nu rinne le nì'i, pues ti'atsi rul'luítsa' tèchì le ttu bechìccu'. <sup>10</sup>Seguramente iŷé clase de ca titsa' té le' yésiloyu, ttu ttu tsa ca nna tse'e ca enne' nu ritelíni qui' quí. <sup>11</sup>Pero para inte' nna canchu labí ritelí te' ca titsa' nu rinne ttu enne', entonces ná ttu nu dittu' para inte', a'hua inte' para la.

<sup>12</sup>Lebi'i nna yala calatsi' le gata' ca capacidad nu runna Espíritu qui' le, pues liguni duel-la' gata' ca capacidad qui' le nu iŷu' para qui'ni iglesia nna thí'a adí fuerza. <sup>13</sup>Acca canchu ttu enne' chi té la'huacca quí'i para innia' ca titsa' láa lenguas, pues ná qui'ni inàbania' Tata Dios por la'huacca para ethàsilà'nà nu ra naá lani titsa' nu ritelíni canu rudà naga' quí quí'i. <sup>14</sup>A'hua canchu gunia' oración lani ca titsa' láa lenguas nna, entonces lani espíritu quí teruba' runia' oración, pero nìhua inte' nna làa ritelí te' biŷa nuá nia'. <sup>15</sup>Biala gunia' cá. Pues guni ba' oración lani ca titsa' nu runna Espíritu lani a', pero guni huá ya' a' lani la' ritelíni. A'hua ca himno espiritual nna gul'la huá' ca lani titsa' nu ritelí te'. <sup>16</sup>Porqui'ni canchu rue' lu' gracia Tata Dios lani titsa' espiritual pero labí ritelíni biŷa nuá ra lu' átsi'ini re' huá ttu nu labí ritelí tsè' tegánia, entonces ti'ani modo ttélínia' para eya'nà de acuerdo lani oración qui' lu' nì'i. <sup>17</sup>Tsè'ba bè' lu' gracia Tata

Dios, pero attu hermano qui' lu'a nna bihua gutelíniã biã nuá ra lu'.

<sup>18</sup>Quiãru Tata Dios qui'ni runne la'huacca quia' ínníã' adí iýé ca títsa' huaya' por Espiritu tì'chu iyaba le. <sup>19</sup>Pero de dú'a' ru'a lo ca enne' le' iglesia nna, adila tsa' ínníã' màsqui'di gayu' títsa' teruba pero lani la' ritelíni quia' para qui'ni ã'hua gulué'nia' ca enne' ttu enseñanza tsè', tì'chula tsii mili' ca títsa' nu bihua ritelíni nuã.

<sup>20</sup>Lebi'i hermanos, bíttuúru ccá la' rulábalatsi' qui' le tì'a la' rulábalatsi' qui' ca huatsa, átsi'ini tsè'ba ná canchu ccá le tì'a ca nito' labí biã tul-la' chi runi çã, pero ná qui'ni rulaba latsi' le lani la' riyeni tsè' ti'gáláa nu té qui' ttu enne' espiritual. <sup>21</sup>Ra Tata Dios lo ley qui'e: Inte' nna inénia' yétsi quiya'á por medio de ca títsa' huaya', ã'hua por medio de ca enne' dittu', pero todavía labí gudà naga' qui quia'.

<sup>22</sup>Acca ca títsa' láã lenguas nna ná çã señal de la'huacca qui' Tata Dios, aláa para guniã cualàni ca enne' chi ríalatsi' sino para qui'ni gappa interés canu labí ríalatsi'. Pero ca mensaje qui' Tata Dios nu rute ri'u lani títsa' nu ritelíni ri'u nna riãu' çã por señal de la'huacca qui'e, álahua para canu bittu ríalatsi', sino para canu ríalatsi'. <sup>23</sup>Canu labí chi nabia' tsè'gani çã, ã'hua canu dia reunión tsítsí'á teruba, biani gulaba latsi' qui' de iyénini çã ruido de rinne iyaba le ca títsa' láã lenguas. Tsí bihua ína çã qui'ni loco ba cca le cá. <sup>24</sup>Pero canchu ttu visitante nna iyéniniã rute iyaba le ttu mensaje de títsa' qui' Tata Dios lani títsa' nu ritelíniã nna, pues por nu riquixá'a

le nna ccá sentir por ca tul-la' qui' nna tsíalatsi'í nna, <sup>25</sup>ã'hua iyaba ca la' rulábalatsi' gattsí' nu tuàniã lo lòstu'í nna iria çã lo rá' nna gudùni ýíbi nna guniã Tata Dios adorar nna ína qui'ni hualigani dù la'huacca qui'e lani le.

<sup>26</sup>Annana hermanos, quixa'ánia' le nu ná qui'ni guni le. Canchu chi retùppa le servicio nna, pues ttu te le nna cate latsi' le thuli le para gul-la le ttu himno. Attu te le nna, para gulue' le ttu enseñanza de títsa' qui' Tata Dios. Attu te le nna, para inne le ca títsa' láã lenguas. Attu te le nna, para quixa'a le biã belue'ni Tata Dios le. Attu te le nna, para ethàtsilà'na le ca títsa'a. Tsè'ba ná qui'ni runi le iyaba ca cosí, pero ná qui'ni ílál'lóni qui'ni nu runi ttu le nna gunnã fuerza espiritual qui' canu tse'e le' iglesia qui' le.

<sup>27</sup>Acerca de ca títsa' láã lenguas nna, ttu o chùppa teruba le, o bedàa' tsùnna ti'gá le, pero además nna bittu. ã'hua uccuàa' bání ladi le guni li ã, pero caduel-la' qui'ni thú ttu hermano nu ethàtsilà'nã nu riquixá'a le. <sup>28</sup>Pero canchu núhuá nuã té para ethàtsilà'na nu rã, entonces bittu ná qui'ni inniã luetsi ca títsa'a ru'a lo iglesia qui' le, sino guni lã na lani la' rulábalatsi' teruba qui' bíi nna guniã oración lani Tata Dios. <sup>29</sup>Canu rute mensaje de nu rute Tata Dios lo losto' qui, ttu o chùppa o tsùnna teruba le. Adí le nna gudà bá naga' le tsè'táa nu riquixá'a çã. <sup>30</sup>De chi rinne ttu le, canchu dua attuã çãhua latsi'í inniã ttu títsa' nu chì' binnia bá iququí, pues labí ná qui'ni ichùã lo títsa' qui' attu nuá, ã'hua attu nuá



nna dàniã gudùtsiã para qui'ni inne áttuã. <sup>31</sup>A' modo nna equixá'a iyaba le mensaje de nu runna Tata Dios lo losto' le, pero ttu ttu tsa bá le para qui'ni iyaba le nna idète' le adí nna ccá le animar adí. <sup>32</sup>Ca hermano canu rute mensaje nna dàni cã gudùtsi cã ã'hua cueda cã gal'la' turno qui' quj. <sup>33</sup>Tata Dios enne' runna mensaje lani le nna bihua rú'ulatsi'e guni ri'u ti'iã ba gappa ri'u antojo, sino rú'u lá latsi'e qui'ni guni ri'u lani orden nna lani la'ÿeni nna, ti'a runi ba adí ca hermanos làti retùppa cã.

<sup>34</sup>Acerca de ca niula qui' le nna, labí ná qui'ni thú cã guni cã discutir para cu'úbia' cã le' ca reunión qui' le, porqui'ni ná para ca nubeyu' cu'úbia' cã ti'a ra huá lo ley qui' ca enne' judío. <sup>35</sup>Canchu ca niula nna calatsi' quj ccá cã saber biã nuá, pues adila tsa' inába titsa' cã ca nubeyu' qui' quj le' litsi' quj, porqui'ni labí rulue' tsè' qui'ni ttu niula thúã nna guniã discutir lani ca nubeyu' le' reunión.

<sup>36</sup>Titsa' qui' Tata Dios nna, tsí ína ri'u gùl'lani ttubã lani le cá. Tsí ína ri'u làteruba lani lebi'i gùl'lani titsa' qui'e cá. <sup>37</sup>Canchu nuã enne' entre lebi'i renã qui'ni Tata Dios runne mensaje lo lòstu'i para equixá'aniã le, o canchu nuã renã qui'ni té la'huacca qui' Espíritu Santo lani ã, pues canchu hualí gáníni cã entonces dàni cã guni cã reconocer qui'ni iyaba ca titsa' nu rudíania' le nna ná por poder nu runna Señor quia' para qui'ni guni le cã. <sup>38</sup>Pero canchu nuã enne' labí calatsi'i guniã aceptar ca tìtsi'i, entonces ã'hua lebi'i nna bittu gudã naga' le qui'i cá.

<sup>39</sup>Acca ÿa hermanos, liguni duel'la' gata' la' huacca qui' le para gute le mensaje nu runna Tata Dios lo losto' le. A'hua bittu gutsùna' le canchu nuã calatsi'i inniã ca titsa' láã lenguas. <sup>40</sup>Pero guni ba le iyaba cã ti'a chi gutixa'ánia' le nna lani orden ba.

**15** Annana hermanos ruréxa'a' latsi' le ca titsa' nu cca qui' Señor Jesucristua, ti'a nu chi benia' predicar lani le dèdèba neru loti' huáalatsi' le, ã'hua hàstaba annana tsittsi' ba tse'e le. <sup>2</sup>Por la'a mísmuba titsa' qui'e nna chi ná le salvo, canchu hua runi ba le ti'a nu chi pá'a' le, pero canchu labí nna entonces rulue' qui'ni labí huáalatsi' le lani itute latsi' le. <sup>3</sup>Iyate nu belue'ni Tata Dios inte' nna, la'a mísmuba ca nua' chi belué'nia' le: primérote, qui'ni Cristua nna gùttie por causa de ca tul'la' qui' ri'u ti'ba ra lo titsa' qui' Tata Dios. <sup>4</sup>Lànianana becàttsi' cã ne le' yèrubaa, pero bitsa tsùnna nna beyáthèe de lo lù'uti, ti'a ra lo titsa' qui'e qui'ni ccá lani e. <sup>5</sup>Bilá' tènì Pedro ne, bitola nna gùdue lahui' ca discípulua de tse'e cabi juntu ba. <sup>6</sup>Bitola nna hua téelá gayu' gayua' ca hermanos bilá'ni cabi e, porqui'ni hué làti tse'e cabi. Entre iyaba ca enne' bilá'ni cabi e nna iÿeru cabi bàni, pero adí cabi nna chi gùtti cabi. <sup>7</sup>Bitola nna bilá' huáni Jacóbua ne; lànianana bilá'ni iyaba ca discípulua ne attu vuelta. <sup>8</sup>Inte' Pablo nna bitò ÿíatení ti'atsi ttu nu gùlia fuera de tiempo ba nna, bilá' huáti' e. <sup>9</sup>Entre iyaba ca apóstol qui' Señor nna, inte' ná' nu bitò tè. Nìdirubani làa dàcca'a' para cca' apóstol, porqui'ni

yala betsía látsa'a' ca creyente qui' Cristua. <sup>10</sup>Pero por la' tsì'ilatsi' qui' Tata Dios lani inte' nna, acca chi ná' nu ná yì'j. La' tsì'ilatsi' qui'e nna bihua nì'i cca nì cuenta bá lani inte', sino adila tsina chi benia' tì'chula iyaba ca apóstol; pero álahua inte', sino por la'huacca qui' Tata Dios lani inte'. <sup>11</sup>Porqui'ni màsqui'ba inte' o ca apóstol bá l'le nna, ttùba ná nu riquixá'a iyaba tu', anía bá huálati' le.

<sup>12</sup>Intu' nna riquixá'a tu' qui'ni Cristua nna chi beyáthèe de lo lù'uti nna bàni rùe nna labiru gattie attu. Tì'álá modo áccá rena ttu te le qui'ni labí eyátha canu yatti cá.

<sup>13</sup>Cáalá hualigani labí posible té eyátha canu yatti nna, entonces nihua Cristua nna labí beyáthèe de lo lù'uti cá. <sup>14</sup>Cáalá lahuábí beyátha Cristua de lo lù'uti nna, entonces lahuábí dacca' nu riquixá'a tu' cá, a'hua lebi'j nna en vano ba ríalatsi' le cá. <sup>15</sup>Cáalá hualigani Cristua nna ná bée yatti, entonces rilá'ló qui'ni huenitsìna falso ba ná tu' ru'a lo Tata Dios, porqui'ni ribèqquia lí tu' qui'ni chi belìthèe Cristua de lo lù'uti, pero beñia ba ná nuá' canchu álahua ná lí qui'ni eyacca bàni canu yatti para labiru gatti ca.

<sup>16</sup>Porqui'ni cáalá bihua eyátha canu yatti nna, entonces nihua Cristua nna bihua beyáthèe cá. <sup>17</sup>Cáalá hualí bihua chi beyátha Cristua de lo lù'uti nna, entonces bihua líacca té fe qui' le lani e nna àtsabá tse'e le le' ca tul'la' qui' le cá, <sup>18</sup>tì'atsi chi gunitti ba iyaba ca hermanos canu chi gùtti màsqui'ba huálati' qui' Cristua, cáalá hua lí bihua beyáthèe. <sup>19</sup>Ri'u canu rebeda qui'ni Cristua

nna gúnnée qui' ri'u nu ná tse', pero canchu álahua ná huá para attu vida, entonces tì'ani modo gata' la' redacca' latsi' qui' ri'u de chi ná ri'u canu ríalatsi' cá.

<sup>20</sup>Pero hualigani qui'ni Cristua nna chi beyáthèe de lo lù'uti. Primérute lèe chi beyáthèe de lo iyaba canu chi gutti. <sup>21</sup>Porqui'ni tì'a lù'uti gùl'laniq por causa qui' ttu enne', a'hua por ttu teruba enne' nna eyátha iyaba canu chi gùtti de lo lù'uti. <sup>22</sup>Porqui'ni tì'a iyaba ri'u ná ri'u nu dacca' gatti porqui'ni iyaba ri'u nna ná ri'u descendiente qui' Adán, á' bá ná qui'ni iyaba ri'u eyátha de lo lù'uti, quiere decir ri'u canu ná ri'u ttùba lani Cristua. <sup>23</sup>Pero ttu ttu tsa ca enne' nna eyátha ca según tiempo nu chi benie señalar; quiere decir yà'la tè Cristua enne' chi beyáthèe, làniana iyaba ri'u ca enne' ná qui'e, canchu chi ìl'lanie attu. <sup>24</sup>De chi gutùe iyaba ca la' rigú'ubia' nna la'huacca nna poder nu té nna, làniana gútie itute nu ná qui'e lani Dios Padrea nna cca cumplir itute. <sup>25</sup>Porqui'ni naduél-la' qui'ni lèe nna cu'úbi'e hàsta qui'ni gunie vencer iyábani canu làa cca guyu ca ne. <sup>26</sup>Lù'uti nna nà último contrario para itùq. <sup>27</sup>Porqui'ni chi bete Tata Dios iyábani ca cosa latsi' ná' ÿi'ni áa para cu'úbi'e. De ra qui'ni iyaba ca cosa chi yù'u ca latsi' né'e nna, pues claru bá yù ri'u qui'ni bíttuhúa cuenta rè' hàstaa propio gani enne' betie ca cosj latsi' né'e. <sup>28</sup>Porqui'ni de chi yù'u iyábani ca cosa bajo la' rigú'ubia' qui' ÿi'ni áa nna, pero la'a mísmuba ÿi'ni áa nna cá huée bajo la' rigú'ubia' qui' enne' betie

iyaba ca così latsi' né'e, para qui'ni làteruba Tata Dios nna thálianie lo iyáte ní. <sup>29</sup>Tì'ala ccá canu cca bautizar parte qui' canu chi gùtti cá, cáalá hualigani labí eyátha canu yatti nna, biala cca ca enne' nna cca cã bautizar parte qui' canu yatti ni'i.

<sup>30</sup>Cáalá labí attu vida té, biálácca riria latsi' tu' cuerpo qui' tu' para gatti tu' de runi tu' Cristua servír cá. <sup>31</sup>Hermanos, por la' redacca' latsi' nu té quia' por lebi'i qui'ni chi ná ri'u ttùba lani Xana' Ri'u Jesucristua nna, nia' le qui'ni dua' lo peligro de lù'uti tulidàba. <sup>32</sup>Loti' gutìl-la' lani ca animal túxú tse'e yétsi Éfesua, cáalá belaba latsa'a' tì'a ca enne' qui' yétsiloyu, biani gana ní gunia' de riria látsa'a' la'labàni quia' por Cristua cáalá bihua attu vida té, pues tì'a rena cã: I'ya go chì ri'u nu té qui' ri'u porqui'ni xiaba guxtíla tè chi gùtti ri'u. <sup>33</sup>Pero lebi'i nna, bittu gute le lugar qui'ni guthacca'yí cã le lani díchua', porqui'ni chí yù ri'u attu dicho nu ra íj: Canchu ccá tsè' ri'u ttu enne' mal, làniana bétsi bétsi bá ítua la' rulábalatsi' tsè' qui' ri'u. <sup>34</sup>Chi ná qui'ni gulaba latsi' le tsè' nna bíttuúru guni le tu'la', porqui'ni tse'e canu labí chi nabia'ni cã Tata Dios. Ná qui'ni ccá le sentir de riyénini le nia' le nui.

<sup>35</sup>Xiaba huarìà ccà'a ttu nu inàbatitsa' nna ína: Tì'ani modo eyátha canu yatti cá. Biani cuerpo ní é:lani lani a cá. <sup>36</sup>Pero inte' nna nia' lu': Tsí ína ri'u bihua chi yù lu' qui'ni ttu semilla to' nna labí eyátsã canchu labí gada ÿa lu' a. <sup>37</sup>A'hua semilla to' nu rada

lu' nna labí chi ná tì'a planta nu ch'ì íl-lani lá, sino ttu semilla to' teruba ná, por ejemplo ttu íyya ÿua'xtíla o bíÿaáruhua attu semilla to'. <sup>38</sup>Làniana Tata Dios nna gunie qui'ni íl-laniã lani forma qui'ì según bá la' rulábalatsi' tsè' qui'e, ttu ttu clase de semilla to' nna lani propio gani forma qui'ì. <sup>39</sup>A'hua ca forma de la'labàni nna álahua iyábani cã ná cã tulappa, sino yètsi' ná forma qui' ttu enne' lani forma qui' ttu animal. A'hua yètsi' huá ná bèla' yù'u láti ca bél-la lani bèla' yù'u láti canu tsia xíla quj; <sup>40</sup>a'hua ca enne' tse'e ÿiabara' lani ri'u canu tse'e le' yétsiloyu nna. Por ejemplo, yala catittini cuerpo qui' ca ángel, pero yà'latsi' ná latsitte qui' cuerpo qui' ri'u canu tse'e le' yétsiloyu. <sup>41</sup>A'hua yètsi' ná la'yani' qui' bitsã' lani la'yani' qui' biuá'ã. Yètsi' huá ná la'yani' qui' ca bélia nna según bá ná ttu ttu bélia nna á' bá rudàni' cã. <sup>42</sup>A'hua ccá canchu chi gal-la' tsá eyátha canu yatti de lo lù'uti. Acca ri'u nna canchu chi gatti ri'u nna igàttsi' bá ri'u nna cuerpo qui' ri'u nna gutsu' bá, pero canchu chi gal-la' tsá qui'ni eyátha ri'u de lo lù'uti, entonces chi té attu cuerpo cubi qui' ri'u nna labiru gutsu'a. <sup>43</sup>Canchu chi gùtti ttu enne' nna rigattsi' bá porqui'ni cuerpo qui'ì nna labiru biÿa íÿu'a, pero de eyàcca bàniã nna làniana ccã ttu cuerpo adiru tsè'. Labiru fuerza té qui' ttu cuerpo canchu chi rigàttsi'a, pero de eyáthã de lo lù'uti nna eyàccã ttu cuerpo de la'huacca cubi. <sup>44</sup>Cuerpo nu rigàttsi' nna, pues cuerpo de bèla' ba ná, pero de eyáthã nna chi ná cuerpo espiritual

nu labiru gatti. Porqui'ni hua té cuerpo para yétsiloyu nna, hua téhuá cuerpo para ÿiabara' nna. <sup>45</sup>Chi ga'na escrito: Adán nubeyu' nérúa nna belùbi Tata Dios ru'a ÿiní'ì nna uccuà nu bàni. Pero attu Adán, quiere decir Cristua nna té la'huacca qui'e para echìthèe canu yatti para ccabàni cã tulidàni. <sup>46</sup>Acca yù ri'u qui'ni labí ná yà'la cuerpo espiritual, sino priméruete nu cca qui' cuerpo para yétsiloyu, lanialá nna eyátha ri'u lani ttu cuerpo cubi. <sup>47</sup>Primero nubéyu'a nna uccuà gùnà' qui' yétsiloyuì, pero segundo ènne'yu'a, es decir Señor nna, née enne' de ÿiabara'. <sup>48</sup>Tì'a uccua la' rulábalatsi' qui' nu nérúa nu ná de guna', á' ná iyaba ca enne' qui' yétsiloyu. Pero ri'u canu té la' rulábalatsi' qui' Enne' ná de ÿiabara' nna, eyàcca ri'u tì'a lèe née enne' de ÿiabara'. <sup>49</sup>Annana ná ri'u tì'a nu uccua de gùnà'a, pero hui'yu tsá ccá ri'u tì'a lèe née enne' de ÿiabara'. <sup>50</sup>Íì nua' calátsa'a' epà'a' le: Labí posible té tse'e ri'u lani Tata Dios de rigú'ubi'e tì'a chì ná ri'u annana, porqui'ni cuerpo nu de bèla' nna réni yù'ri'u nna labí ccabàniã para siempre sino gattiã nna gutsu'ã nna.

<sup>51</sup>Annana quixa'ánia' le ttu enseñanza nu labí chi bina le: Alàa iyaba ri'u gatti ántesca íl'iani fin, pero iyaba ri'u etsiání cuerpo qui' ri'u para ccã attu cuerpo cubi. <sup>52</sup>Quetha taá tì'a ttu rixua rinna' lo ttu enne' ccá nua' canchu chi cuetsi trompeta final, porqui'ni hua ná qui'ni cuetsi trompétaá, làniana eyátha ca enne' de lo lù'uti para labiru gatti cã, pero ri'u canu

bàni ru nna etsiá huání cuerpo qui' ri'u. <sup>53</sup>Porqui'ni cuerpo nu rutù ba qui' rí'uì nna, naduél'la' qui'ni etsiáníã para ccã nu labiru etù. A'hua cuerpo nu ná qui'ni gatti nna ná qui'ni etsiáníã para cca bàniã tulidàba. <sup>54</sup>Cuerpo qui' ri'u nu retù ba nna té qui'ni tté bá qui'ì, pero canchu chi betsiáníã para ccã ttu cuerpo nu labiru etù nihua labiru gatti nna, entonces ccã cumplir nu ra lo Escritura:

Labiru lù'uti té para siempre,

<sup>55</sup>Labiru dolor ná lù'uti para lani ri'u,

A'hua labiru la'huacca té qui' yerubà para lani ri'u.

<sup>56</sup>Porqui'ni por ca tul-la' qui' ri'u nna té qui'ni gatti ri'u, a'hua por ca mandamiento nu ra lo ley nna acca yala poder té qui' ca tul-la' lani ri'u.

<sup>57</sup>Pero quí'yarú Tata Dios por Xana' Ri'u Jesucristua, porqui'ni por lèe nna chi runi ri'u vencer lo iyáte ní.

<sup>58</sup>Acca ÿa hermanos to' quia', litsé'le tsittsi tulidàba, lihue'èl-la' latsi' le adí'ulá guni le tsina qui' Señor, bittu gudùtsi le guni li e servir, porqui'ni chi yù le qui'ni tsina nu runi le para lèe nna labí nã tsina cuenta bá.

**16** Annana nu cca qui' ofrenda para ca enne' chi ríalatsi'. Liguni tì'hua nu chi gutixa'ánia' iyaba ca iglesia anta' le' región nu lá Galacia. <sup>2</sup>Primero tsá qui' ttu ttu semana nna, cuequia le yà'latsi' según runna Tata Dios qui' le nna guni li ã prevenido, bittu cueda le hàsta'na íl'iania' nna thulo le gutùppa le ofrenda. <sup>3</sup>Canchu chi íl'iania' làti tse'e le nna, làniana ca hermanos nu beni le nombrar nna,

ithél·la' ya' çà por medio de carta para tahua' cabi ofrenda qui' lía Jerusalén. <sup>4</sup>Canchu adila tsa' tsà'a huá' nna, entonces làcabi nna thá' cabi lani inte'.

<sup>5</sup>Íl·lania' huèni le visitar le' ciudad Corinto canchu chi tsa'á' le' región Macedonia, porqui'ni nialá ná qui'ni ttí'a' yà'la. <sup>6</sup>Aya huacca eyà'na sà' lani le, xiaba eyà'na' hàsta qui'ni tté tiempo idil·la', bitola nna ithèl·la' le inte' según gáyalá ná qui'ni tsa'á'. <sup>7</sup>Labí calátsa'a' néda de téebá ttía' làti tse'e le, porqui'ni adiru calátsa'a' eyà'na sà' tià' lani le canchu a' nani Tata Dios. <sup>8</sup>Pero eyà'na rùà' le' yétsi Éfesui hàstaá qui'ni huíni tu' celebrar tsá Pentecostés. <sup>9</sup>Porqui'ni chi biyàlia ttu néda tsè' nì para gunia' adí tsina qui' Señor, màsqui'ba iyetse' ca contrario quia' tse'e. <sup>10</sup>Canchu chi íl·lani hermano qui' ri'u Timotéua làti tse'e le nna, guni le qui'ni lã nna thúã lani le sin biya la' rulábalatsi', porqui'ni ná huá huenitsina qui' Señor tì'ba inte'. <sup>11</sup>Bittu cani le qui'ni labí ná gã enne' dacca', sino guni li a recibir tsè' para qui'ni gappã la'yeni nna ethèl·la' li a para qui'ni el·laniã làti dua', porqui'ni inte' lani adí ca hermano nna ribèda tu' a. <sup>12</sup>Acerca de hermano qui' ri'u Apolos nna, yala gutta'yúnia' bi qui'ni thá' bi lani adí ca hermano qui' ri'u de itá çà làti tse'e le, pero labí uccua qui' bi porqui'ni labí ná voluntad qui' Tata Dios para itá bi anna. Pero canchu chi gappa bi néda nna, làniana itá bi.

<sup>13</sup>Litsé'e al tanto, litsé'e tsittsi lani ca enseñanza nu chi ríalatsi'

le, ligappa valor nna ccá le enne' tsittsi espiritualmente taá. <sup>14</sup>Iyaba nu runi le nna, liguni çà lani la' tsi'ilatsi'. <sup>15</sup>A'hua rinába'a' attu favor lani le, hua yù bá le qui'ni Estéfnas lani familia qui' bi nna ná cabi enne' huáalatsi' priméruete le' ituba región Acaya làti tse'e liã, a'hua hua yù ba le qui'ni tulidàba yala runi cabi servir ca enne' qui' Tata Dios. <sup>16</sup>Acca rinába'a' qui'ni gudà naga' le nu rena cabi, a'hua qui'ni gudà tsè' naga' le nu rena iyaba adí ca hermano canu runi huá çà cualàni le' tsina qui' Señor lani itute latsi' quí. <sup>17-18</sup>Yala redacca' te' qui'ni bèl·lani hermano qui' ri'u Estéfnas, a'hua ca hermano Fortunato nna Acaico nna, pues làcabi nna beni cabi vez qui' le porqui'ni lanú lebi'i tse'e tiempo lanía, pero por làcabi nna uccuaýén tabání latsi' lóstu'a', a'hua lósto' le. Acca liguni cabi estimar, a'hua adí ca hermano tì'a làcabi. <sup>19</sup>Ca hermano qui' iyaba ca iglesia anta' nì le' región Asia nna rithel·la' cabi la' rinàbatitsa' lani le. Lani nombre qui' Señor nna rithel·la' hermano qui' ri'u Aquila lani niula qui' bi Priscila la' rinàbatitsa' lani lebi'í, a'hua iglesia nu re' le' litsi' cabi nna rithel·la' huá cabi la' rinàbatitsa' qui' le. <sup>20</sup>Pues iyaba ca hermano tsè'e nì nna yala saludo rithel·la' cabi lani le. Liguni saludar luetsi le lani la' tsi'ilatsi' tì'a ná qui'ni guni ca enne' qui' Tata Dios. <sup>21</sup>Annana la'a mísmuba inte' nna rudíania' le lani propio gani nàya' nna rithèl·la' huá la' rinàbatitsa' quia' lani le. <sup>22</sup>Canchu entre lebi'í dù ttu nu labí catsi'íniã Señor, pues ica'rútsi'íruã

porqui'ni chi ná condenado.  
 Maranatha, tì'a rena ri'u: Chì'  
 taáduḡ el-lani Señor. <sup>23</sup>Xana' Ri'u  
 Jesucristua nna gunie le cualàni.

<sup>24</sup>Rithél-la'a' iḡeni la' tsì'ilatsi' nu  
 té lo lóstu'a' lani iyaba le, lani  
 nombre qui' Cristo Jesús.  
 A' bá ná.